

# CA TITSA' TSE' NU CCA QUI' JESUCRISTUA NU BEDIA SAN MARCOS

El Santo Evangelio Según

## SAN MARCOS

---

**1** Gudulo evangelio nu cca qui' Jesucristua Ÿi'ni Tata Dios, <sup>2</sup>tì'ba riquixé'e lo libro nu bedia profeta Isaías enne' gùdua ántescala ìta Jesucristua yétsiloyu:

Inte' nna rithél-la'a' mensajero quia', deneru bi lo lu',

Para ithàlia bi néda para guni cã lu' recibir.

<sup>3</sup>Rùyeni ttu enne' fuera yetsi nna ra bi ca enne' ritsina' ru'a lo bi:

Lítsé'e leda porqui'ni chi da' Señor; liutha' lí ca néda qui' la'labàni qui' le para lèe.

<sup>4</sup>Ca tìtsi'ì nna uccua cã cumplir por Juan enne' beni bautizar. Gurèni bi fuera yetsi nna, gutixa'áni bi ca enne' lani poder qui'ni dàni cã eyacca cã arrepentir por ca tul-la' qui' quì para qui'ni eyuniyén latsi' Tata Dios qui' quì nna ccá tè cã bautizar. <sup>5</sup>Biria tè ca enne' qui' iyaba ca yetsi to' anta' le' región qui' Judea, a'hua iyaba canu Jerusalén huía cã làti du Juárez

para gudà naga' quì qui' bi. Beyuni cã reconocer ca tul-la' qui' quì lani Tata Dios, làniana Juárez nna beni bi cã bautizar le' yò Jordán. <sup>6</sup>Juán nna guccu' yó bi nu de ittisa' yó camello, guthi tè lè'e bi ttu cincho nu de yeti. Uccuabàni tèni bi tsua' teruba ttu clase guxaru', a'hua yixi qui' i'yatò. <sup>7</sup>Gutixà'a huáni bi cã nna ra bi: Enne' ìl-lani bitola de inte' nna, adí la'huacca té quì'e tì'chu inte'; nìdirubani làa dàcca'a' para iyèta'a' cuequua' ca guarachu yù'u nì'e, porqui'ni née enne' santo. <sup>8</sup>Inte' nna runia' le bautizar lani inda, pero lèe nna gunie le bautizar lani Espíritu Santo.

<sup>9</sup>Tiempo lània nna biria Jesús le' yetsi Nazaret región qui' Galilea. Begàdia tè Juárez ne inda le' yò Jordán. <sup>10</sup>De beria Jesús le' indaá nna bilá'nie qui'ni biyàlia yíabara' nna huadi Espíritu Santo tì'a ttu becha to' nna bitsine'e iquie.

<sup>11</sup>Biyeni tení tsi'ì ttu enne' gunne de yíabara' nna rèe: Lu' nna ná lu'

Yi'nia, yala catsi'í te' lu'; por lu' nna yala la' redácca'latsi' te quia'.

<sup>12</sup>Làniataá nna guche' Espíritu Sántua Jesús le' desiértua lá.

<sup>13</sup>Nía nna gùdue chua' ubitsa nna chua' yèla nna. Tsè'e huá iyètse' ca animal tuxu nía. Numalua nna benià ne prueba canchu hua rialànià gunie nu calatsi'í. Bitola nna bitsina' ca ángel nna beni cabi Jesús servir.

<sup>14</sup>Loti' té Juáan litsi' iyyàa nna, deyya Jesús para Galilea. Nía nna gutixè'e ca titsa' tsè' cubi nu cca qui' la' rigú'ubia' qui' Tata Dios, <sup>15</sup>rèe: Annana chi bi'yu tsá calatsi' Tata Dios qui'ni ca enne' nna hue'él-la' cã qui'ni quée enne' cu'úbia'nie cã; acca leyàcca arrepentir por ca tu'l-la' qui' le nna lítsíalatsi' le ca titsa' nu rulue' ti'iýa modo l-lá le.

<sup>16</sup>Loti' rènie ru'a indatò' qui' Galilea nna, bilá'nie Simón lani bettsi' bi Andrés rudàl-la cabi exxa nu rudàxu'ní cabi bél-la, porqui'ni uccua cabi nu huedàxu' bél-lá. <sup>17</sup>Ra tè Jesús cabi: Lita lani inte', inte' nna gunia' qui'ni ca enne' la guni le pescar. <sup>18</sup>Betha'na taá cabi ca exxa nna dia tè cabi lani e. <sup>19</sup>Guttè tí'díbee nía nna bilá'nie Jacobúa lani bettsi' bi Juáan yù'u cabi le' bárcuá lani tàta qui' cabi Zebedéua, reyuni cabi ca exxa nu rudaxu'ní cabi bél-lá. <sup>20</sup>Gutàyi' tìe cabi. Làcabi nna betha'na taá cabi tàta qui' cabi Zebedéua le' bárcúa lani adí canu tsè'e nía hueni cualani nna, dia tè cabi lani Jesús. <sup>21</sup>Bitsina' cabi le' yetsi Capernaum. Ca tsá redi' latsi' ca enne' Israel nna huía Jesús le' sinagoga làti retuppa cã. Nía nna gutixa'ánie cã ca enseñanza tsè' qui'

Tata Dios. <sup>22</sup>Yala biquila' latsi' qui' por ca enseñanza qui'e, porqui'ni adírula tsè' gutixa'ánie cã ti'chu ca maestro nu rulue' nu ra lo ley qui' religión qui' caniá. <sup>23</sup>Le' sinagoga qui' caniá nna re' ttu nubeyu' cã padecer por ttu espíritu malo, guduluã gunniã iditsa nna, <sup>24</sup>rã: Jesús enne' Nazaret, biani té qui' lu' lani intu' acca da' lu' nì. Tsí da' chì lu' para gul-luýa lu' latsi' tu', áccá. Hua nabia' ba te' lu', ná lu' Enne' Santo guthel-la' Tata Dios. <sup>25</sup>Gutitsa' tè Jesús na nna rée: Bethia rú'a lu' nna beria lo losto' nubeyu'í. <sup>26</sup>Espíritu malua nna becuíbi tsà'tsà'niã nubeyu'a nna, idítsani gurètsiya'a, làniana betsè'e latsi'í nubeyu'a. <sup>27</sup>Adírulá uccuayí latsi' iyábani ca enni'a, acca gunàba titsa' luetsi qui' nna ra cã: Biagani nui cá. Biani enseñanza cubi ni nui cá. Nubeyu'í nna té la'huacca qui'í para guniã mandar hàstaá ca espíritu malo, atsi'íni hua runi caso cã qui'í nna. <sup>28</sup>Làniana tsàtito'ni gudàa titsa' qui'e ituba región qui' Galilea. <sup>29</sup>De beria cabi le' sinagógaá nna huía cabi litsi' Simón nna Andrés nna lani Jacobúa nna Juáan nna. <sup>30</sup>Suegra qui' Simón nna té tiã yi'bél-laniã yìl-lá. Gutixà'a tènì cabi Jesús qui'ni ra'niã. <sup>31</sup>Làniana gubígue'e nna bedaxu'e ní'í nna guchithee na. Luégutaánì nna beria chiã yìl-láa nna beni tabã cabi servir.

<sup>32</sup>Gùl-là diba lània chì' benia taánì bitsa nna, tàhua' cã ru'a lúe iyaba canu ra'ni ã'hua canu cca padecer por ca espíritu malo.

<sup>33</sup>Iyábani ca enne' le' yétsiá nna bituppa cã ru'a puértaá. <sup>34</sup>Jesús

nna beyunie iyétse'ni canu rà'niá télá télá bá ná itsahue' yù'u çà. A'hua benie mandado qui'ni beria iyétse' ca espíritu malo lo losto' ca enne'. Nihua labí be'él'le'e ca espíritua inne çà, porqui'ni benibíá' bá çà nuŷa née.

<sup>35</sup>Attu yu'udílaá hua náru chul'la nna, huatha Jesús nna huíe ttu lugar yà'latsi', nía nna benie oración. <sup>36</sup>Simón a'hua adí ca enne' tsè'e lani bi nía nna beyíla cabi e. <sup>37</sup>De betseláni cabi e nna ra cabi e: Iyáŷiani ca enne' reyíla çà cuiá'lu'. <sup>38</sup>Lèe nna rèe cabi: Lítsa' adí ca lugar canu anta' exa gáabá para qui'ni guni huáni ya' çà predicar. Porqui'ni para nui la daya'. <sup>39</sup>Benie predicar le' ca sinagoga qui' ca enne' Israel itúbani Galilea, a'hua benie mandado qui'ni beria ca espíritu malo lo losto' ca enne'.

<sup>40</sup>Bitsina' tè ttu nubeyu' ra'niá yétsu' yutsu', bedùni ŷibì ru'a lúe nna gutta'yúniá ne nna raç: Canchu hua calatsi' cuiá'lu' nna huaccani cuiá'lu' eyuni cuiá'lu' inte'. <sup>41</sup>Jesús nna yala betúa latsi'e na, becà tè né'e beláppe'e na ra tiè: Huacca látsa'a', beyacca nàri. <sup>42</sup>Cuantu taání rèe na anía nna, betua chì itsahue' qui' niá nna beyacca taá latsi'j. <sup>43</sup>Làniana bechu titsa' tiè na, pero yala recomendar benie na, <sup>44</sup>rèe: Bè' cuidado qui'ni nú ttú tè nuŷa quixá'ani lu', sino huía ru'a lo sacerdotéa para qui'ni ilá'ni bi lu', bete tè ofrenda qui' lu' tì'a nu beni Moisés mandado muestra de qui'ni chi beyacca nàri lu', para qui'ni cáyén latsi' qui'. <sup>45</sup>Nubeyu'a nna bedà' dibà nna guduluá bedàà titsa' gutixà'á iyaba nu uccua. Acca

labiru uccua gá'a ga Jesús dàcca'lo taá le' yétsiá, sino adila tsa' bega'na bée fuera làti lanú iyé enne' tsè'e. Pero siempre dihua huía ca enne' qui' iyábani ca yétsiá ru'a lúe.

**2** Tuchùppa ubitsa bitola nna huía Jesús attu le' yetsi Capernaum. Bina tè ca enne' qui'ni ri'e nía. <sup>2</sup>Làniana bituppa chì nuŷeni ca enne' hasta qui'ni labiru uccuaní çà liú'u, a'hua ru'a puerta nna bitsa'tí'ni ca enne'. Lèe nna runìnie çà predicar titsa' qui' Tata Dios. <sup>3</sup>Bitsina' tè tappa ca nubeyu' nùà'ni çà ttu nu ra'ni parálisis, nidirubani làa cca ttá. <sup>4</sup>De tántuani ca enne' yétsi'á nna labí uccua gá'a çà làti dùe, acca huappi çà iquua yú'u la nna, guthàlia çà liŷia taá làti dùe, guchìda tè çà enne' rà'niá yu'á lè'e camilla. <sup>5</sup>De bilá'ni Jesús qui'ni yala fe té qui' qui' lani e acca rèe nu rà'niá: ŷì'nia', chìba beyuniŷén látsa'a' ca tul'la' qui' lu'. <sup>6</sup>ŷua tení tuchùppa ca maestro de la ley nía nna, liú'u losto' bá qui' nna ra çà: <sup>7</sup>Bianicca rena nubeyu'j á' ni'i. Ca titsa' mal ba rinniá contra Tata Dios, porqui'ni nuni ccani gunittiluá ca tul'la' qui' ca enne' canchu álahuá tsuá' teruba Tata Dios cá. <sup>8</sup>Pero Jesús nna gutelí taánie ti'lŷa ná la' rulábalatsi' qui' qui', acca rèe çà: Bianicca rulába latsi' le' á'. <sup>9</sup>Biala adí yánaba gunia' para nu ra'niá'. Tsí épa' ya' a: Chìba beyuniŷén látsa'a' ca tul'la' qui' lu', o tsí épa' ya' a: Beyátha nna bedi' camilla qui' lu'á' nna gùda' áccá. <sup>10</sup>Pues, para qui'ni ccá le saber qui'ni inte' Nubeyu' de ŷiabara' té la'huacca quia' le' yétsiloyu'j para eyuniŷén látsa'a' ca tul'la', làniana

bel'luítse'e nu rà'niá nna, <sup>11</sup>rèe na: Beyátha nna bedi' camilla qui' lu'a'á nna beyya litsi' lu'. <sup>12</sup>Lá nna beyátha tabá nna bedi' tiá camilla qui' niá nna beria ru'a lo iyáỹiani ca enni'a, acca yala biquila' latsi' qui' nna bedàliani ca Tata Dios nna ra ca: Nunca labí chi bilá'ni ri'u luetsi nui.

<sup>13</sup>Bitola nna beria Jesús nía nna huía tiè attu ru'a indatù'a. Iyáỹiaba ca enne' nna bitsina' ca ru'a lúe. Lèe nna gutixa'lánie ca ca enseñanza tsè' cubi qui' Tata Dios. <sup>14</sup>Néda bá yu'ée nna bilá'nie ttu enne' láq Leví ỹi'ni Alfeo ri'á lo meỹa làti ría ca enne' huiỹa qui' impuesto nu ruquiỹa gobierno. Jesús nna rèe na: Gutà tanó inte'. Lá nna gudulí taá nna dia tiá lani e. <sup>15</sup>Làniiana bitsina' Jesús le' yú'u qui' Leví nna guduanie lo meỹa, tsè'e huá iỹetse' canu ruquiỹa qui' impuesto, a'hua adí canu dàa titsa' qui' qui' runi ca nu labí ná de acuerdo lani ley religiosa qui' ca enne' judíua nna, ỹù'àni iyaba ca júntuba lo meỹa lani Jesús nna ca discípulo qui'áa nna, porqui'ni enne' ỹétse'ni denó ca ne. <sup>16</sup>Ca maestro de la ley a'hua adí canu dianó ca religión fariseo nna, de bilá'ni ca qui'ni ro Jesús lani canu riquiỹa qui' impuéstua a'hua lani adí canu runi tul-la' nna, ra tè ca ca discípulo qui'áa: Bianicca ri'ya ro bá maestro qui' líá' lani canu ruquiỹa qui' impuesto a'hua lani adí canu tul-la' ni'i. <sup>17</sup>De biyénini Jesús nui nna rèe ca: Canu bihua ra'ni nna, pues bihua riquina'ni ca médico, sino làteruba canu ra'ni. Labí daya' para gáỹia' canu rulaba latsi' qui' qui'ni

chi ná ca enne' tsè', sino daya la' para gáỹia' canu tul-la'.

<sup>18</sup>Ttu vuelta loti' ca discípulo qui' Juáan a'hua ca discípulo qui' ca fariséua nna runi ca ayunar, bitsina' tè tuchùppa ca enne' ru'a lo Jesús nna ra ca ne: Bianicca ca discípulo qui' Juáan a'hua ca discípulo qui' ca fariséua' nna runi ca ayunar, atsi'íni ca discípulo qui' cuía'lu'a'á nna bihua rigua tí' ca làa ro ca. <sup>19</sup>Becàbini Jesús ca nna rèe: Tsí ina ri'u qui'ni canu tsè'e thá'a guni ca ayunar miéntraste dù ba lani ca nubeyu' ruttsaná'a cá. Pues miéntraste dù nóviua lani ca nna labí guchia ca làa go ca porqui'ni ná tiempo de la' redacca' latsi'. <sup>20</sup>Pero canchu i'yu tsá qui'ni ítua ènne'yu'a, lànialá nna guni ca ayunar. <sup>21</sup>Lanú nuỹa regú'u remiendo ttu vestido viejo lani ttu pedazo lari' cubi, porqui'ni la'a mísmuba remiendo cúbía nna ichèda'a lari' viéjuá, entonces adila iyàl-la' làti chi birèda'a. <sup>22</sup>Nihua lanu nuỹa rigá'a vino cubi le' ca bolsa vieja nu de yéti, porqui'ni por fuerza qui' vino cúbía nna itsu' lá ca bolsa yétiá nna ilàlia vínuá, a'hua yétiá nna labiru iỹu'a. Acca ná qui'ni vino cúbía nna ità'a le' yéti cubi.

<sup>23</sup>Ttu tsá sábadua nna guttè Jesús làti té ỹua'. Ca discípulo qui'áa nna hua dia càna ba cabi guduló cabi guchèccu' cabi tuchùppa ỹua'. <sup>24</sup>Làniiana ca fariséua nna ra tè ca Jesús: Gunna' tsáruhua, bianicca runi ca discípulo qui' lu'a'á nu labí ná qui'ni guni ttu enne' tsá redi' latsi' ri'u ni'i. <sup>25</sup>Pero Jesús nna rèe ca: Tsí núncahua ni' gul-la le biỹa

beni rey David loti' labí bíya té go bía nna yala gutùni bi a'hua canu tsè'e lani bía cá. <sup>26</sup>Gutà'a David le' templo qui' Tata Dios loti' Abiatar ná huexána' qui' ca sacerdotéa nna gutò bi ettaxtíla nu ná ofrenda para Tata Dios, ettaxtíla nu lanu nuya dàniã gúã na sino làteruba ca sacerdotéa. Atsi'íni hàstaá canu tsè'e lani bía nna bete huá bi gutò çà, pero bihua beni Tata Dios bi juzgar qui'ni ná tul'la'. <sup>27</sup>Jesús nna raáruhué çà: Beni Tata Dios tsá redi' latsi' ri'u para bien qui' ri'u, aláa benie ca enne' por causa de tsá redi' latsi' ri'u. <sup>28</sup>Acca Nubeyu' de Ýiabara' nna née Señor qui' iyaba ca tsá a'hua tsá para edi' latsi' ri'u.

**3** Attu vuelta gutà'a Jesús le' sinagógaá. Nía nna re' ttu nubeyu' nu gubitsi yà'aba ná' bànj. <sup>2</sup>Ca fariséua nna betsia tsittsi chini lo quj ne canchu hueyunie na tsá redi' latsi' quj, para qui'ni gappa çà néda bíya caúsani gutsia çà qui'e. <sup>3</sup>Jesús nna rée nubeyu' nu gubitsi yà'aba ná' niá: Lu' nna gùduli nna gùdu làhui'. <sup>4</sup>Làniana rée çà: Tsí hua ná qui'ni guni ri'u tsè' ca tsá redi'latsi' ri'u, o tsí guni la ri'u mal áccá. Tsí hua ná qui'ni eyuni ri'u ttu enne' màsqui'ba ná tsá redi' latsi' ri'u, o tsí hue'él'la' bá ri'u a gattiã áccá. Pero làçà nna tsi diruba gutsé'e çà. <sup>5</sup>Làniana gunne'e iyaba çà lani dí'latsi' nna yala triste uccuanie porqui'ni labí uccua latsi' quj télini çà qui'e, acca ra tie nubeyu'a: Bè:lìi ná' lu'. Lã nna bè:lìi taá ní'j, làniana tì'a viva beyacca chì ná' niá. <sup>6</sup>Beria bá ca fariséua nna bè' çà titsa' lani canu gulátsi partido láq herodiános

contra lèe ti'iyala modo gudaxu' çà ne preso nna gutti çà ne.

<sup>7</sup>Pero Jesús nna dia tìe ru'a indatù'a la lani ca discípulo qui'áa. Tanó tehuá ca enne' ýétse'ni qui' Galilea ne, a'hua ca enne' Judea nna. <sup>8</sup>A'hua iyétse'ni ca enne' Jerusalén nna ca enne' Idumea l'le, canu attu lado la yò Jordán l'le, a'hua ca enne' biria le' ca yetsi Tiro nna Sidón nna, de bina çà qui'ni ca milagro ýénini runie nna acca bituppa tè çà ru'a lúe. <sup>9</sup>Ra tie ca discípulo qui'áa qui'ni gúdu cabi bárcuá prevenido taá para qui'ni làa uquini ca enne' ýétse' niá ne.

<sup>10</sup>Por tántua ca enne' chi beyunie nna, acca iyábani canu ra'ni nna ritil'lani çà para gulappa' çà ne.

<sup>11</sup>De bilá'ni ca espíritu malo ne nna bedu ýibi quj ru'a lúe nna guretsi ya'a çà nna ra çà: Cuiã'lu' nuã' ná Ýi'ni Tata Dios. <sup>12</sup>Pero lèe nna idí'tse' gunnènie çà qui'ni nú ttu tehuá nuya quixá'ani çà qui'ni lèe Enni'a Ýi'ni Tata Dios.

<sup>13</sup>Bitola nna huappi Jesús lo i'yaá, làniana becuí'e tuchùppa ca enne' nna gutaýie cabi. Làcabi nna bitsina' tè cabi ru'a lúe. <sup>14</sup>Benie formar ttu grupo lani tsi'nu ca enni'a para qui'ni tsé'e cabi lani e tulidába, a'hua para ithel-le'e cabi hueni predicar evangelio. <sup>15</sup>Bete hué la'huacca qui' cabi para eyúnini cabi iyábani itsahue', a'hua para ebequia cabi ca espíritu malo lo losto' ca enne'. <sup>16</sup>Simón enne' gutixa hué lá bi Pedro; <sup>17</sup>a'hua Jacobo ýi'ni Zebedeo lani Juan bettsi' Jacobua ca enne' gutixa hué lá cabi ýi'ni nu rinne iditsani tì'a ídiu'; <sup>18</sup>a'hua Andrés nna Felipe nna

Bartolomé nna Mateo nna Tomás nna Jacobo ÿi'ni Alfeo nna, a'hua Tadeo nna Simón enne' gulátsi' partido láq cananístas nna, <sup>19</sup>Judas Iscariote nu betiã ne cuéntaá para gattie nna. Làniana deyya cabi le' yú'u.

<sup>20</sup>Attu vuelta nna bituppa ca enne' ÿétse'ni hàstaá para go cabi labí gùppa cabi néda. <sup>21</sup>De bina ca pariente qui'áa nna huá ca para eche' ca ne, porqui'ni ra ca enne' chi ribèqquiaÿíq la' riyeni qui'e. <sup>22</sup>A'hua ca maestro de la ley canu da' de Jerusalén nna rena ca qui'ni Beelzebú nu ná huexána' qui' ca espíritu máluba du lani Jesús. Ra huá ca qui'ni por la'huacca qui' Beelzebú nna runi Jesús mandado rera ca espíritu malua' lo loto' ca enne'. <sup>23</sup>Làniana bel-luítse'e ca maestro de la ley nna gutixa'ánie ca ttu comparación nna rèe: Labí gudal-la Satanás fuera ca huenitsina qui'í. <sup>24</sup>Canchu nuÿa ttu gobierno lá'aní la' rigú'ubia' qui'í nna entonces labí itsáagá cuí'á. <sup>25</sup>A'hua canchu lá'aní ttu familia por biÿa ca disgústoni nna, entonces labí itsáagá gúchiã. <sup>26</sup>Pues adítelá canchu Satanás chathã para til-lã contra là'a labí, entonces labí itsá cuí'ã, sino qui'ni lluÿa tabá latsi'í. <sup>27</sup>Lanú nuÿa irialàni gá'ã le' litsi' ttu nubeyu' valiente canchu álahuá gudaxu' ÿá na guxiqquiã na, lànialá nna hua rialàniã cueqquiã iyate nu té le' litsi' enni'a. <sup>28</sup>Hualigani te' riquixa'ánia le qui'ni iyábani ca tul-la' nu runi ca enne' nna eyuniÿén bá latsi' Tata Dios qui' qui, a'hua iyábani ca tita' mal biÿa tediba cláseni ná ca nna tehua

perdón qui' qui. <sup>29</sup>Pero nuÿa tediba runiã despreciar nu runi Espíritu Santo nna, jamás labiru eyuniÿén latsi' Tata Dios qui'í, sino qui'ni chi ná culpable para siempre. <sup>30</sup>Aníã rèe porqui'ni làq nna gunne ca qui'e qui'ni dua ttu espíritu malo lo lostu'e.

<sup>31</sup>Bitola nna bitsina' ca bettsi' áa a'hua nàna qui'áa ribeda cabí fuera, guthel-la' cabi mandado tul-luítza' ca ne. <sup>32</sup>Ca enne' ÿua luítta' áa nna ra ca ne: Nàna qui' cuí'lu'a a'hua ca bettsi' cuí'lu'a tsè'e cabi fuera nna reyila cabi cui'lu'. <sup>33</sup>Becàbinie ca nna rèe: Nuni nua' ná nàna quia' nna ca bettsi'à' nna cá. <sup>34</sup>Làniana gunna' tie ca enne' ÿua ìta'lubánie nna ra tie: Niba tsè'e ca bettsi'à' nna nàna quia' nna, <sup>35</sup>porqui'ni nuÿa tediba runi nu rú'u latsi' Tata Dios, pues làcanuá nna ná ca bettsi'à' nna dána'a' nna nàna quia' nna.

**4** Attu vuelta nna gudulo Jesús gutixè'e ca enseñanza tsè' qui' Tata Dios nna bituppa ca enne' ÿetse' ìta'lubánie. De tántuani ca enni'a nna gutè'e le' ttu barco duã ru'a indatù'a nna gùdua tènìe; iyábani ca enni'a nna tsè'e ca loyu bitsi ru'a indatù'a. <sup>2</sup>Jesús nna gutixa'ánie ca iÿetse' ca enseñanza por medio de ca comparación nu cca qui' yétsiloyu' nna ÿiabara' nna rèe: <sup>3</sup>Liudaáruhuá naga' le ca tita' quíyí'í: Ttu campesino nna diã huadàl-la ÿua'. <sup>4</sup>De rudal-lã ÿú'a nna bitsina' tí' ÿua' qui' níã cuitta' néda, huadi tè ca binni to' nna bediga' ca na. <sup>5</sup>Ati' ÿú'a nna bitsina'a' le' íyyarrúe làti labí tegã guna' re'. Acca tsastitaá gul-laniã

porqui'ni labí itettia ga re' guna'.  
<sup>6</sup>Pero de gul·lani bitsa nna bequèxu'  
 taá yú'a porqui'ni labí dia l·lú'  
 itettia, acca gubitsi taá. <sup>7</sup>Ati' yú'a  
 nna binnia làti yù'u huá l·lú' ca  
 yèttse'. Ca yèttsi'a nna gul·lani  
 tehuá cã nna bedibàga' taá cã lo  
 yú'a, acca yú'a nna labí bennã lènà'.  
<sup>8</sup>Pero ati' yú'a nna bitsina'ã le' loyu  
 bèbè. Nía nna gul·laniã nna biyeniã  
 nna benna tiã lènà' nu guyú'u lì'j  
 tsii érua' nna, nu benna bá gayúna'  
 nna, nu benna ba gayua' nna.  
<sup>9</sup>Làniana rèe cã: Nu calatsi' ídete'  
 nna, pues gudà tsè' nagui'j.

<sup>10</sup>Loti' re' ttubée nna gubiga' tè  
 tuchùppa ca enne' tsè'e nía lani  
 ca enne' tsì'nua nna gunàba titsa'  
 cabi e de nu cca qui' ejèmplua.  
<sup>11</sup>Lèe nna rèe cabi: Lebì'i nna hua  
 ná qui'ni ccá le saber clárutaá ca  
 enseñaanza nu cca qui' reino qui'  
 Tata Dios, ca cosa nu labí chi yù  
 ca enne' antes. Pero canu labí lánì  
 cã ri'u nna, entonces puro lani  
 comparaciòn bá riquixa'ána ya'  
 cã; <sup>12</sup>para qui'ni ccá cã tì'a canu  
 rinna' ccã pero labí edacca'ni cã  
 màsqui'ba iyénini cã pero labí biyã  
 télini cã nna, labí eyequua cã lani  
 Tata Dios para eyuniyén latsi'e ca  
 tul·la' qui' qui'.

<sup>13</sup>Làniana rèe cã: Tsí bihua  
 nì' télini le enseñaanza acerca de  
 comparaciòn nu gutixà'a ya'a  
 cá. Tì'ala modo télini le adí ca  
 comparaciòn nu quixa'ánia' le  
 ni'i. <sup>14</sup>Enne' bedàl·la yú'a nna  
 runiã comparar ttu enne' riquixá'a  
 titsa' qui' Tata Dios. <sup>15</sup>Ttu te ca  
 enne' nna ná cã tì'a yua' nu binnia  
 cuitta' nédaá nna bediga' ca binni  
 tú'a na. Porqui'ni de riyénini cã ca

titsa' qui' Tata Dios nna, ril·lani taá  
 Satanás nna rigua taá ca titsa' nu  
 chi biyàda lo losto' qui'. <sup>16</sup>Attu te ca  
 enne' nna ná cã tì'a yua' nu binnia  
 le' íyyarrúea nna tsati taá gul·laniã,  
 porqui'ni de riyénini cã titsa' qui'  
 Tata Dios nna yala lani gusto rudà  
 naga' qui', <sup>17</sup>pero labí tsittsi ga'na  
 fe qui' qui', acca tito' rúbá ruchia cã.  
 Canchu chi ril·lani ca prueba nna  
 rutsia latsi' ca enne' cã porqui'ni  
 ríalatsi' qui' ca titsa' qui' Tata Dios  
 nna, luégutaá redúl·la'a latsi' qui'  
 nna ccá taá cã apartar. <sup>18</sup>Attu te  
 ca enne' nna ná cã tì'a yua' nu  
 binnia le' yèttse' nu gul·lani xiã  
 nna bethàga' taá lo yú'a. Porqui'ni  
 de riyénini cã titsa' qui' Tata Dios,  
<sup>19</sup>yala nùyue cani cã por ca cosa  
 qui' yétsiloyui, a'hua ridacca'yí taá  
 cã porqui'ni ridà latsi' qui' bel·liu  
 nna bíyãaru ca cosa material nna.  
 Iyaba ca nui nna ruthàga' taá cã  
 tsina nu runi ca tìtsi'j lo losto' qui',  
 làniana labiru runi cã nu rú'ulatsi'  
 Tata Dios. <sup>20</sup>A'hua attu te ca enne'  
 nna runi cã comparar tì'a yua' nu  
 binnia le' loyu bèbèa: ttuã nna  
 bennã tsii érua', attuã nna bennã  
 gayúna', attuã nna gayua'. A'teni  
 ná ca enne' de riyénini cã titsa' qui'  
 Tata Dios, ríalatsi' qui' nna runi tè  
 cã nu rú'ulatsi'e según tì'iyã ná bá  
 capacidad nu te qui' ttu ttu qui'.

<sup>21</sup>Raáruhuée cabi: Tsí hua rugàl·la'  
 ri'u ttu yí' nna rutòthe' tè ri'u ttu  
 cajón lú'j, o rudua ri'u a yãrèe' lònà  
 cá. Tsí álahuá nã para gudua ri'u a  
 ttu lugar làti gudani'ã itúyiani le'  
 yú'u. <sup>22</sup>Porqui'ni labí biyã nu gattsì'  
 ní té sin qui'ni làa ilá'níã, nihua  
 biyã ca enseñaanza nu gattsì' ní té  
 sin qui'ni làa iyàtsilà'nã ru'a lo

iyaba ca enne'. <sup>23</sup>Nu calatsi' ídete' nna, pues gudà tsè' nagui'ì. <sup>24</sup>Ra hué cabi: Líútsia tsè' cuidado nu riyénini le; porqui'ni canchu labí gudà tsè' naga' le nna, tito' rúbá la' ritelíni gata' qui' le. Pero lebi'ì canu calatsi' ídete' le nna, adítelá tsani la' ritelíni qui' le porqui'ni rutsia tsè' le cuidado nu riyénini le. <sup>25</sup>Porqui'ni nuña tediba té la' ritelini qui'ì nna, lą nna thí' lą adí, canchu hua runiá seguir ríalatsi'ì. Pero nu labí té qui'ì nna, pues hàstaá tito' nu rulaba latsi'ì qui'ni té qui'ì nna, ítua telá. <sup>26</sup>Raáruhué: Reino qui' Tata Dios nna náą tì'a nu cca canchu chi ttu campesino rudà-lą ÿua' le' ttu loyu. <sup>27</sup>Ra'áthi bą nna, aníabá runiá ritte ca tsá, miéntraste semilla tú'a nna reyattsą nna ril-lanią nna riýeni huá nna; pero nubeyu'a nna nidí làa yuà ti'íyala modo cca ca cosí. <sup>28</sup>Porqui'ni por lóyúa nna reyattsą ÿua' tú'a; primérute de ril-lanią ną ttu ixxi' to' teruba, laniana ril-lani èttse' qui'ì, pero bitola nna ru'u ÿua' to' lì'ì. <sup>29</sup>Canchu chi rigattsia nna reruą lani ÿyà sela, porqui'ni chi bi'yu tsá gutuppą lènà'.

<sup>30</sup>Raáruhué: Biani tì' ná reino qui' Tata Dios. Biani guni ri'u ą comparar cá, pues quixa'ánia' le. <sup>31</sup>Ná tì'a ttu bétsi' to' qui' cuana, porqui'ni canchu chi riyadą le' loyu nna adí teláni xcuichuto' ną de lo iyaba ca semilla nu té le' yétsiloyu. <sup>32</sup>Pero ril-lani díbą nna riýenią adiru de lo iyaba ca planta nna, yáyipà'ni riduą hàstaá qui'ni ca binni to' nna riýua çą le' ÿula qui'ì.

<sup>33</sup>Lani iýetse' ca comparación tì'a ca nua' nna gutixa'ánie çą titsa' qui' Tata Dios, ti'íya tébá la' riyeni

qui' qui'. <sup>34</sup>Tulidàba gutixa'ánie ca enne' por medio de ca comparación, pero iyábani bethàtsi là'nànie ca discípulo qui'áa yà'ba latsi'.

<sup>35</sup>Gùl-là diba tsá lània nna rèe ca discípulo qui'áa: Lítsa' attu ládua'la. <sup>36</sup>Bechu titsa' díbée ca enne' ÿétsi'á, làniana ca discípulo qui'áa nna guche' cabi Jesús attu lado indatù'a la le' barco nu yù'uéa taá. Dia hua adí ca barco to' lani barco nu yù'u Jesús. <sup>37</sup>Lo indatù'a bá dàa cabi nna huatha ttu iyyabe' fuérteni, chi rà'a inda le' bárcuá hàstaá qui'ni chì' taá ritsa'ą inda. <sup>38</sup>Jesús nna ti'éthibée, ÿua iquie lo ttu xconi dacca' cuè'e la bárcuá. Ca discípulo qui'áa nna bedibàni tè cabi e nna ra cabi e: Maestro, tsí bihua nùyue du cuią'lu' qui'ni chi rinetsi ri'u le' indí. <sup>39</sup>Làniana huatha Jesús nna gutítse'le be'a nna indatù'a nna rèe: Tsi bá, tsi tè. Làniana gudutsi tabá be'a. Indatù'a nna beyatta' tsi tabá. <sup>40</sup>Jesús nna ra tie cabi: Biecca yala rátsini le ni'ì. Tsí bihua ríalatsi' le qui'ni té la'huacca quia' cá.

<sup>41</sup>Làniana adila la' rátsilatsi' bitsina' lo losto' cabi nna ra luetsi cabi: Nugani enni'ì, acca hàstaba be' nna indatù'ì nna riyénini çą qui'e.

**5** Bitsina' tè cabi attu lado qui' indatò' Galilea región qui' ca enne' gadarenos. <sup>2</sup>De beria Jesús le' bárcuá nna bitsina' tè ttu nubeyu' ru'a lúe beria le' ttu bèlìà nu dua le' panteón nía. Nubeyu'a nna cçą padecer por ttu espíritu malo. <sup>3</sup>Lą nna gùduą làti rigattsì' canu yatti, lanú nuña ririalàni uýìqquią na tsittsì nihua lani cadena. <sup>4</sup>Porqui'ni iýé vuelta tsè' chi beýìqquia çą nì'a ní'ì lani cadena, pero tsàstiní

richuà çà. Acca lanu nuŷa ridàa lani à. <sup>5</sup>Tulidàba ribènià réla ritsá ba ribétsiya'á lo ca i'ya nna le' panteón nna, la'a làbà nna rue' látì lani ca íyyá nna richu çà látì. <sup>6</sup>Idittu' nna bilá'nià Jesús, bigàa chià tattsa'á ne nna beduŷibì ru'a lúe. <sup>7</sup>Gunne tià iditsa nna rà ne: Jesús Ýì'ni Tata Dios Tsuna', bianicca da' cuià'lu' nì, ratta'yúnià' lu' qui'ni guni lu' jurar nna gudu lu' por testigo Tata Dios qui'ni bittu guni lu' inte' castigar. <sup>8</sup>Anía rà porqui'ni gunne Jesús nna rèe na: Lu' espíritu malo, beria lo losto' nubeyu'á. <sup>9</sup>Gunàba titsa' tiè espíritu malua nna rèe: Lu' nna gutixa'áni inte' biŷa lá lu'. Becàbià nna rà: Batallón lál', porqui'ni nuŷé tsè'ni tu' ná. <sup>10</sup>Làniana yala gutta'yúnià ne qui'ni bittu ithel-le'e na fuera distrítua. <sup>11</sup>Exa gáabá nía nna tsè'e tè iŷétse'ní ca cuttsi huila go cuitta' i'yaá. <sup>12</sup>Iyaba ca espíritu malua nna gutta'yú teni çà Jesús nna ra çà ne: Guthel-la' intu' làti tsè'e ca cùttsià' para tsú' tu' lo losto' quì. <sup>13</sup>Jesús nna bete tiè permiso qui' quì. Làniana ca espíritu malua nna betsè'e latsi' quì nubeyu'a nna gutà'a çà lani ca cùttsia. Hua ná ttú chuppa mili' ti'gá ca cùttsia. Iyaba çà nna uccua litsiani çà nna gutù'lu çà lo ttu iyyatò' nna binnia çà le' inda nna gùtti çà. <sup>14</sup>Canu rappa ca cùttsia nna beyya çà quèthani táquixá'ani çà ca enne' le' yétsiá à'hua ca rancho tú'a. Biria chì ca enne' dia çà tanna' çà biŷa nuá uccua. <sup>15</sup>Bitsina' çà làti du Jesús lani nubeyu' loco nu uccua padecer por iŷetse' ca espíritu malua nna, bilá'ni çà qui'ni niya'atsùbani

rì'á chi naccu' ŷúj nna, acca yala gutsini çà. <sup>16</sup>Canu bilá'nia nna gutixa'a çà ti'iŷa ná nu uccua lani nubeyu' guyú'u espíritu malo lo losto' niá, à'hua nu uccua lani ca cùttsia nna. <sup>17</sup>Acca gutta'yúni çà Jesús qui'ni eria bée látsi caniá. <sup>18</sup>Loti' díe éye'e le' bárcuá nna, nu uccua padecer por espíritu malua nna gutta'yúnià ne qui'ni hue'él-le'e na cuenià lani e. <sup>19</sup>Pero Jesús nna labí be'él-le'e na sino qui'ni rèe na: Beyya litsi' lu' làti tsè'e ca enne' qui' lu'a, gutixa'áni çà ti'iŷa ná ca cosa ŷeni nu chi beni Señor lani lu', à'hua ti'iŷa chi betúa latsi'e lu' nna. <sup>20</sup>Nubeyu'a nna deyyá guduluà rudàa titsa' le' ituba región qui' tsìi ca yétsiá riquixá'á ti'iŷa ná ca milagro nu chi beni Jesús lani à. Iyaba canu biyénini testimonio quì' nna yala biquíla' latsi' quì.

<sup>21</sup>Bettè bá Jesús attu vuelta le' ttu barco para attu ládula indatù'a nna, bituppa tè iŷé mili' tsè'ni ca enne' ru'a lúe. Lèe nna du bée ru'a indatù'a. <sup>22</sup>Bitsina' tè Jairo, nubeyu' principal qui' sinagógaá. Bilá' bánià Jesús nna bedu taá ŷibì ru'a lúe. <sup>23</sup>Yala gutta'yúnià ne nna rà: Chì tení ratti ŷi'ni niula to' ya'a, tsí hua dá' bála cuià'lu' gutsia ná' cuià'lu' iququì para qui'ni eyacca latsi' nna ccabànià. <sup>24</sup>Dia tè Jesús lani à nna. Denó tehuá enne' ŷétse'ni Jesús nna rùquini çà ne. <sup>25</sup>Dia hua nía ttu niula nu chi uccua tsì'nu ida ra'nià rilàlià réni. <sup>26</sup>Yala remedio chi beni ca médico na, chi benittiluà iyate nu té quì' però labí reyacca latsi'ì, sino adila riyal-la' lánià. <sup>27</sup>Chì binà qui'ni Jesús runie ca milagro, acca huía tià cuè'e lée

lahui' ca enne' yétsi'á nna belappa'a  
 yúe, <sup>28</sup>porqui'ni uccuaní: Canchu  
 guláppa'a' màsqui'di yúe nna  
 eyacca taá látsa'a'. <sup>29</sup>Làniataá  
 nna guru réni qui' niá, gutebé'  
 taániá qui'ni chi beyacca latsi'í.  
<sup>30</sup>Luégutaá gutebé'ni Jesús qui'ni  
 beyunie nuãa ttu enne' lani  
 la'huacca quì'e, acca bedeqquia  
 tè lúe gunne'e ca enne' da' cuè'e  
 lée nna rée: Nuni nua' belappa'a  
 yó yò'í. <sup>31</sup>Ca discípulo qui'áa nna  
 ra cabi e: Hua rilá' bání cuiá'lu'  
 qui'ni ca enne' yétse' ruquini ca  
 cuiá'lu', atsi'íni ra cuiá'lu': Nuni  
 nua' belappa'a inte' nna. <sup>32</sup>Pero lèe  
 nna gunne'e ita'lubánie nuãa nuá  
 belappa'a ne. <sup>33</sup>Niuláa nna yala  
 gutschiniá nna biyíiti'níá nna porqui'ni  
 benniá cuenta nu chi uccua lani á,  
 acca gubiga'a nna beduyíbi ru'a lúe,  
 gutixa'ániá ne nu beniá. <sup>34</sup>Jesús  
 nna bechu títse'e niuláa nna rée:  
 Yí'nia', por fe nu té qui' lu' lani  
 inte' nna chi ná lu' salvo; bíttuúru  
 biyá cani lu', porqui'ni dèsdeba  
 anna chi beyacca latsi' lu'. <sup>35</sup>Atsabá  
 rinne Jesús nna gul'lani mandado  
 da' ca litsi' nubeyu' principal qui'  
 sinagógaá nna ra ca: Chi gùtti yí'ni  
 cuiá'lu'a, biáruá liecca uquitsi' rùnì  
 cuiá'lu' Maestrau'. <sup>36</sup>Pero biyeni  
 taáni Jesús nu ra canaá, acca ra tìe  
 nubeyu' principal qui' sinagógaá:  
 Bittu gátsini lu', huía teruba latsi'  
 lu'. <sup>37</sup>Jesús nna labí uccua latsi'e  
 qui'ni núyaáru tsía làniá ne sino  
 làteruba Pedrua nna Jacóbua  
 á'hua Juáan bettsi' Jacóbua.  
<sup>38</sup>Bitsine'e litsi' nubeyu' principal  
 qui' sinagógaá nna bilá'nie qui'ni  
 iyétse'ni ca enne' chi tùppa, ttu te  
 ccá nna yala lani la' rehuini' latsi'

tsè'e ca pero attu te ca nna tsè'e  
 ca huìl-là. <sup>39</sup>Gutà'a tìe nna rée ca:  
 Bianicca tanto alboroto runi le  
 nna ribetsi le ni'i. Niula cuìti'í nna  
 bihua ná nu yatti, sino ti'éthibá.  
<sup>40</sup>De biyénini ca nu reáa nna, burla  
 la beni ccá ne. Làniana benie  
 mandado qui'ni iria iyaba ca enne'  
 nna gutaýi tìe tàta nàna qui' niula  
 cuìti'a á'hua tsùnna canu dia ca lani  
 áa, gutà'a tìe làti té niula cuìti'a.  
<sup>41</sup>Gutèl-le'e ná' niula cuìti'a nna  
 rée na: Talita cumi. Titsa' qui'ba  
 ri'u nna rá: Niula to', inte' nia' lu',  
 beyátha. <sup>42</sup>Luegu taáni nna beyatha  
 chì niula cuìti'a nna reda' chiá. Chi  
 yu'á tsì'nu ida ti'gá. Ca enne' tsè'e  
 nía nna caligálání tsía ca uccuani  
 ca de tántua gutschini ca. <sup>43</sup>Pero  
 Jesús nna gunnènie ca qui'ni nú ttu  
 tehuá nuãa quixá'ani ca, làniana  
 beni tìe mandado qui'ni gute ca nu  
 go niula cuìti'a.

**6** Bedà' tè Jesús nía nna  
 betsine'e látsi áa. Dia tè ca  
 discípulo qui'áa lani e. <sup>2</sup>Níabá  
 tsè'e cabi gùl-la' tsá redi' latsi' ca  
 enne' judíua nna, guduló Jesús  
 gutixa'ánie le' sinagógaá titsa' qui'  
 Tata Dios. Iyétse' canu biyénini ca  
 enseñaanza qui'áa nna yala biquíla'  
 latsi' qui' nna ra ca: Gala bethete'  
 nui ca cosí cá. Ti'iyá modo acca  
 tanto tsè' chi nabia'niá hàstaá para  
 guniá ca milágrua' cá. <sup>3</sup>Tsí álahuá  
 nui nua' carpintéruá yí'ni María,  
 bettsi' Jacóbua nna Joséa nna Judas  
 nna Simóon nna cá. Tsí álahuá niba  
 tsè'e ca daní lani ri'u cá.

Por nui nna labí huíalatsi' qui'  
 qui'ni née Yí'ni Tata Dios. <sup>4</sup>Pero  
 Jesús nna rée ca: Ttu profeta, gaýa  
 tediba rappa ca na titsa', pero canu

látsi nna ca pariente quì'ì nna nìdi caso làa runi ca quì'ì. <sup>5</sup>Acca labí iýéégá milagro benie nía, sino tuchùppa teruba ca enne' nna betsia né'e iquua quí nna beyunie ca. <sup>6</sup>Lèe nna yala uccuaýí latsi'e porqui'ni labí huíalatsi' quí ne. Làniana gureníe le' ca yetsi to' canu anta' nía, gutixa'áníe ca enne' ca enseñanza tsè' qui' Tata Dios.

<sup>7</sup>Bitola nna gutaýi Jesús ca enne' tsì'nua, gudulúe guthel-le'e chuppa chuppa cabi nna betie la'huacca qui' cabi sobre ca espíritu malo para qui'ni eria ca fuera. <sup>8</sup>Benie mandado qui'ni bittu biýa huá' cabi de tsù'u cabi néda, sino ttu yà to'. Ra huée qui'ni bittu huá' cabi morral nihua ettaxtíla, nihua bittu bel-liu cu'ú le' bolsa qui' cabi. <sup>9</sup>Dàni cabi gúl'lia cabi guarachu sencíllotó' taá, pero bittu gaccu' cabi chuppa cua' lári'. <sup>10</sup>Raáru huée cabi: Gaýa diba gá'a le le' ttu yú'u nna, nía bá ccá lugar qui' le hàsta'na gal-la' tsá eda' le le' yétsiá. <sup>11</sup>Nuýa ttu lugar làti bihua recibir guni ca le nihua làa gudà naga' quí qui' le, entonces eria le nía nna gucuíbi tè bestè nì'a le, ttu seña para télini ca qui'ni labí tsè' beni ca. Hualigani te' riquixa'ánia' le qui'ni adila fuerte cca la' tsìalatsi' qui' Tata Dios nu chì' da'la lani yétsiá tì'chula juicio nu uccua lani ca yetsi Sodoma nna Gomorra nna. <sup>12</sup>Ca discípulo qui'áa nna guda' tè cabi nna guduló cabi hueni predicar qui'ni ca enne' nna dàni ca ehuiní'ni ca nna gútse' latsi' quí ca tul-la' qui' quí. <sup>13</sup>Beni cabi mandado ca espíritu malo qui'ni eria ca lo losto' ca enne' nna beyacca latsi' quí. A'hua bedua cabí

aceite iquua nuýetse' canu ra'ni nna, beyacca latsi' quí por la'huacca nu betie lani cabi.

<sup>14</sup>Bina tè rey Herodes iyaba nu cca qui' Jesús, porqui'ni chi gùthilàlia ba titsa' quì'e le' ttu ttu yetsi. Acca ra Herodes: Juan el Bautista nu béttí ya'a, pues lą nua' chi beyathą de lo lù'uti acca té iýeni la'huacca quì'ì nna runią ca milágrua'. <sup>15</sup>Adí ca ra ca: Elías nuą'. Attu te ca nna ra ca: Ttu nu rinne parte Tata Dios nuą' ti'a beni ca profeta gutsé'e ttu cuaýa nuá. <sup>16</sup>De bina Herodes nu ra ca enni'a nna, acca ra tìą: Juan nu benia' mandado ichu ca yáni niá, pues lą nua' chi beyathą de lo lù'uti. <sup>17</sup>Porqui'ni la'a mísmuba Herodes nna benią mandado qui'ni gudaxu' ca Juáan preso nna bexiqquia ca bi lani cadena nna bedàl-la ca bi litsi' iyya. Anía beni Herodes porqui'ni de guýi'ą Herodías niula qui' bettsi'í Felípea, <sup>18</sup>Juáan nna ra tè bi ą: Labí ná qui'ni thí' lu' la'a niula qui' bettsi' lu'ą' bá. <sup>19</sup>Acca Herodías nna yala beyudí'ą Juáan, uccua latsi'í guttią bi. <sup>20</sup>Pero rey Herodes nna gùppa bą Juáan respeto porqui'ni biénba yùą qui'ni yala exa gudu bi lani Tata Dios, ą'hua labí biýa tul-la' beni bi nna, acca bè' bą bi cuidado qui'ni nú ttu nuýa biýa gudacca'ą bi. A'hua màsqui'ba labí gutelí gánia bícca'áya nuá gutixa'a bi, pero yala guyú'u latsi'í gudà nagui'í qui' bi. <sup>21</sup>Pero loti' gùl-la' cumpleaños qui' Herodes nna betseláni Herodías ttu oportunidad, porqui'ni beni Herodes ttu fiesta nna gutàýia canu re' cuenta nna ca capitán nna ą'hua adí canu dacca' qui' Galilea

go se' qui' lani a. <sup>22</sup>Gut'àa tè niula cuiti' ÿi'ni Herodías le' yú'u làti cca fiéstaá nna beyà'a ttùbà lahui' qui'. Herodes lani canu ÿuàni cã lo meÿa lani a nna yala guyú'u latsi' qui'. Acca ra rey Herodes niula cuiti'a: Gunàbani inte' biÿa tediba calatsi' lu', inte' nna gunna ya' a qui' lu'. <sup>23</sup>Làniana beni Herodes prometer lani juramento nna rã: Biÿa tediba inàbani lu' inte' nna gunna ya' a qui' lu' hàstaba tsal'lu'e' la' rigú'ubia' quia' canchu calatsi' lu'. <sup>24</sup>Niula cuiti'a nna biria tiã nna rã nàna qui' niá: Biani inába'a'. Nàna qui' niá nna rã na: Iqquia Juan el Bautístã'. <sup>25</sup>Làniana quèthani beyeqquia làti dua rey nna rã: Calátsa'a' qui'ni anna tení gunna lu' quia' le' ttu plato iqquia Juan el Bautístã'. <sup>26</sup>Rey Herodes nna yala behuini'niã, pero por causa de qui'ni chila beniã jurar, a'hua labí uccua latsi'ì itìniyúã lani canu ÿua lo meÿa lani a, acca labí uccua latsi'ì gutsibia' niula cuiti'a. <sup>27</sup>Luégutaá nna guthel-la'ã ttu soldado táchua' yáni Juaan eyua' tiã iqquia bía. <sup>28</sup>Huíã tè soldadua le' litsi' ìyyàa nna guchua' yáni Juáan, denua' tiã na le' ttu plato, betiã na lani niula cuiti'a. Niula cuiti'a nna betiã na lani nàna qui' niá. <sup>29</sup>De bina ca discípulo qui' Juáan nu uccua nna, huía tè cabi taÿi' cabi cuerpo qui' bía nna becattsí' cabi bi le' ttu yerubã. <sup>30</sup>Làniana ca tsi'nu discípuluá canu guthel-la' Jesús, betsina' cabi ru'a lúe nna gutixa'áni cabi e iyate nu chi beni cabi, a'hua iyaba ca enseñanza nu gutixa'a cabi. <sup>31</sup>Lèe nna rèe cabi: Lità tsía ri'u para edi' tí' latsi' ri'u ttu lugar yà'latsi'.

Anía rèe porqui'ni ca enne' ÿetse' nu reda' nu ritsina' bá cã ru'a lúe nìdirubani làa rappa cabí neda para go cabi. <sup>32</sup>Acca dia tè tsua' làteruba cabi le' ttu barco para ttu lugar yà'latsi'. <sup>33</sup>Pero iÿétse'ni ca enne' nna bilá'ni cã dia cabi le' bárcuá nna bedacca' huáni cã Jesús. Acca nuÿetse' cã guda' cã le' ca yetsi qui' qui' nna dia tè cã lani n'ia bá qui' tsàru'a indatù'a bá nna. Yà'lalá làcã bitsina' attu ládúa. <sup>34</sup>De beria Jesús le' bárcuá, bilá'nie qui'ni enne' ÿétse'ni tsè'e chì nía ribeda cã ne nna, yala betúa latsi'e cã porqui'ni ná cã tì'a ca carneru to' nu lanú pastor qui' qui' té. Làniana gudulúe gutixa'ánie cã iÿetse' ca enseñanza nu cca qui' Tata Dios. <sup>35</sup>De chi da' râl'làa nna gubiga' ca discípulo qui' Jesús ru'a lúe nna ra cabi e: Chi ral-la nna a'hua làti tsè'e rí'ui' nna ga'nã fuera yetsi. <sup>36</sup>Acca bechu titsa' dí cuiã'lu' ca enne' para qui'ni tsía cã le' ca rancho to' a'hua ca yetsi to' canu anta' ita'lubá nna para gó'o cã ettaxtíla, porqui'ni nì nna labí té biÿa go cã. <sup>37</sup>Becãbi Jesús nna rèe cabi: Lebi'i ba líúte go cã. Làcabi nna ra cabi e: Tsí ina ri'u huaccani lani chuppa gayua' denario bel-liu nna tsá' tu' gó'o tu' ettaxtíla suficiente para úgo tu' ca enne' ÿétsi'ì cá. <sup>38</sup>Jesús nna rèe cabi: Bàl'lac'àa ettaxtíla dèni le, lítsía tsánna líúyu bàl-la ÿa té nná. Belaba tè cabi nna ra cabi e: Gayu' ettaxtíla, chuppa bél-la to' nna. <sup>39</sup>Làniana beni e mandado qui'ni xuani iyaba ca enni'a lo tácca'a. <sup>40</sup>Guÿua tení cã nía por fila nna, tsieyóna' o gayua' ca enne' ttu ttu fila. <sup>41</sup>Làniana guÿi'e gayu'

ettaxtílaá nna chuppa ca bél:la tú'a nna guchitha lúe gunne'e ÿiabara' nna gunàbèe bendición lani Tata Dios. Làniana gùl:le'ée ca ettaxtílaá nna bete tìe lani ca discípuhá para qui'ni quithia cabi lani ca enni'a. A'hua gutithia tehuée chuppa ca bél:la tú'a entre iyaba çà. <sup>42</sup>Iyáÿiate çà nna gutò çà ti'íÿa bá uccuaní qui' qui. <sup>43</sup>Làniana betùppa cabi atsi'nu tsummi thú tsà'ti'ni ca pedazo ettaxtila canu béxaá, aníahua ca bél:la tú'a. <sup>44</sup>Entre iyaba canu gutúa nna hua ná gayu' mili' tì'ga ca nubeyu'.

<sup>45</sup>Bitola nna ra Jesús ca discípulo qui'áa qui'ni éya'a cabi le' bárcuá nna enèru bétsi cabí para Betsaida ttu yetsi rì'á attu lado qui' indatù'a, miéntraste lèe nna rechu títse'e ca enne' ÿétsi'á. <sup>46</sup>Bechu titsa' díbée ca enni'a nna huía tìe lo ttu i'ya. Nía nna benie oración. <sup>47</sup>De bichul:la tsè' nna chi dia bárcuá lahui' indatù'a, Jesús nna turúbée du yúbitsi. <sup>48</sup>Bilá'nie cabi qui'ni yala ridacca' cabi rutha' cabi bárcuá porqui'ni contra lá cabi du bè'a. Chì' tegáabá da' ràni'a nna dia tè Jesús ride'e lo indatù'a uccua latsi'e tté tabée lo cabi. <sup>49</sup>Pero de bilá'ni cabi e ride'e lo indaá nna uccuani cabi qui'ni née ttu nu tsáyela, acca guretsi yà'àni cabi de tántua tsani' uccuani cabí. <sup>50</sup>Yala gutsini iyaba cabi. Pero bel:luítsa' taá Jesús cabi nna rèe: Ligappa confianza, inte' ba nui, bittu gátsini le. <sup>51</sup>Gutà'a díbée le' barco làti yù'u cabía nna gudu tsi taá bè'a. Ca discípuhá nna yala biquíla' yà'àni latsi' cabi, <sup>52</sup>porqui'ni labí chi gutelí tsè'ni cabi acerca de milagro nu beni

Jesús lani ca ettaxtílaá; pues àtsaba re'niá chul:la le' la' riyeni qui' cabi. <sup>53</sup>De beyacca guttè cabi lo indatù'a nna bitsina' cabi región nu lá Genesaret. Nía nna bexíquia cabi bárcuá ru'a indatù'a. <sup>54</sup>Beria cabi le' bárcuá nna bedacca' taáni ca enne' Jesús. <sup>55</sup>Huía chì çà bedàa çà titsa' ita'lubáni región nía. Làniana guduló chì ca enne' ril:lani çà gatti' bání da' çà chè' çà canu ra'ni, ÿua çà lo camilla gaÿa tediba runa çà qui'ni rì'e. <sup>56</sup>Gaÿa tediba díe le' ca yetsi to' l:le le' ca ciudad l:le, a'hua ca rancho to' l:le, pues rixa çà canu ra'ni lo néda làti rittie ratta'yúni çà ne qui'ni hue'él:le'e çà gulappa' çà màsqui'di ru'a ÿúe. Iyaba canu belappa' çà ne nna beyacca taá latsi' qui.

**7** Làniana bitsina' ca fariséua lani tuchùppa ca maestro de la ley ru'a lo Jesús, da' çà de Jerusalén. <sup>2</sup>Làçà nna bilá'ni çà qui'ni tuchùppa ca discípulo qui' Jesús nna labí beni cabi purificar ná' cabí de gùl:la' go cabí, quiere decir labí gutíi ná' cabi conforme lani nu ra ca enne' fariséua. <sup>3</sup>Porqui'ni ca fariséua a'hua iyaba adí ca enne' judíua nna runi çà seguir ca costumbre religiosa qui' ca enne' gùla qui' qui, labí ro çà canchu labí primérute rii ná' qui conforme lani costumbre qui' qui. <sup>4</sup>A'hua canchu chi retsina' çà ria çà i'yya nna, labí ro çà canchu labí primérute gude çà inda lo la'gò qui' qui. A'hua iÿétse'éru adí ca costumbre denó çà; hàstaá ca taza nu ri'yàni çà inda, ca ré'e qui' qui nna ca traste nu de metal qui' qui nna, hàstaba lònà qui' qui nna,

pues rii cą cą según bá ca regla qui' qui' para ccá cą purificar. <sup>5</sup>Ca fariséua ą'hua ca maestro de la ley nna gunàba titsa' cą nna ra cą ne: Bianicca ca discípulo qui' lu'ą' làa runi cą según ca costumbre nu bethà'na ca ta' tàta qui' ri'u para guni ri'u, pues bihua rii ná' qui' segúnbá religión qui' tu' ántesca go cą, acca rappa cą tul-la'. <sup>6</sup>Becàbi Jesús nna rèe cą: Falso bá ná la' rulábalatsi' qui' le. Làtegáláa riquixá'a Tata Dios acerca de lebi'į lo libro nu bedia Isaías enne' uccua profeta:

Yetsi rì'į nna, lani rú'a terúbįi rudettią inte'.

Pero lostu'į nna idittu' tsè' duą lani inte'. <sup>7</sup>De balde bá rexa latsi' qui' inte',

Porqui'ni doctrina nu riquixá'a cą nna ná mandamiento nu gulèqquia bá iquua ca enne'.

<sup>8</sup>Ą'ba runi le, porqui'ni en vez de runi le cumplir nu ra lo mandamiento qui' Tata Dios nna, yala purari cca le para guni le ca costumbre qui' ca enne' ti'a nu runi le canchu chi rii le ca ré'e l-le ca vaso nu ri'yàni le inda l-le, ą'hua iýtse'ėru adí ca costumbre luetsi ca nua'. <sup>9</sup>Làniana rèe cą: Buen ti'a tsè' ccani le rirú'na le nu ra lo mandamiento qui' Tata Dios para qui'ni guni la le ca costumbre qui'ba le. <sup>10</sup>Por ejemplo, ta' tàta qui' le Moisés nna ra bi: Gùppa lu' respeto tàta nàna qui' lu'. Ra huá bi: Nuýa tediba qué' iquua tàta nàna qui'į nna té qui'ni gattią. <sup>11</sup>Pero lebi'į nna rena la le: Canchu ttu enne' nna gą tàta nàna qui'į: Labiru cca quia' gunia' le cualani porqui'ni

itute nu ná gunia' le cualani nna chila ná Corbán (Corbán rena cą: ofrenda nu rutsia cą yà'latsi' para Tata Dios), <sup>12</sup>canchu chi rena ttu enne' anía nna, entonces lebi'į nna labiru rue'él-la' li ą gunia' cualani tàta nàna qui'į. <sup>13</sup>Anía modo nna rirú'na le titsa' qui' Tata Dios nna denó lá le ca costumbre malo nu rulue' huáni le ca ý'i'ni le. Ą'hua iýtse'ėru luetsi costumbre máluį runi le. <sup>14</sup>Làniana gutàýi Jesús iyaba ca enne' ýėtsi'á nna rèe cą: İyate le nna liudà naga' le nu inni y'į para qui'ni télini le. <sup>15</sup>Labí biýa té nu ro ttu enne' runia' qui'ni ccą enne' tul-la', sino nu riria lá lo losto' ttu enne' nna runia' qui'ni ccą nu tul-la'. <sup>16</sup>Nu calatsi' ídeti'ą nna pues gudà tsè' nagui'į. <sup>17</sup>De bede'e làti tsè'e ca enne' ýėtse'á nna gutè'e le' yú'a, làniana gunàba titsa' tè ca discípulo qui'áa ne sobre de ejemplo nu beni áa. <sup>18</sup>Jesús nna rèe cabi: Tsí ą'hua lebi'į bihua té la' riyeni qui' le. Tsí labí ritelíni le qui'ni nì ttu cosa nu ro ttu enne' nna labí runia' qui'ni ccą nu tul-la'. <sup>19</sup>Porqui'ni nu rá'a rú'a ttu enne' nna labí ritsina'ą lo lostu'į, sino qui'ni dia bá lì'į, bitola nna reria bá. Anía ra Jesús para qui'ni télini ri'u qui'ni iyábani ca alimento nna ná cą tsè' para go ri'u. <sup>20</sup>Làniana rèe: Nu riria la lo losto' ttu enne' nna runia' qui'ni ccą nu tul-la'. <sup>21</sup>Porqui'ni de lo losto' la ttu enne' nna riria ca la' rulábalatsi' mal, ti'a ttu nu ridualàni ttu enne' nu labí ná tselį, ą'hua la' huetti enne' nna, <sup>22</sup>la' ubànà nna, la' dàalatsi' biýa té qui' attu enne' nna, la' hueni maldad nna, la' huenilatsi' nna, ą'hua bíýaáru ca vicio nna,

la' yélatsi' nna, la' batta' nna, la' necio nna. <sup>23</sup>Iyaba ca cosa mal nì nna riria cā de lo losto' ca enne', acca iyaba cā chi ná cā enne' tul-la', alàa porqui'ni labí rigua cā ca costumbre qui' le.

<sup>24</sup>Bedà' tè Jesús nía nna huíe le' región làti anta' ca yetsi Tiro nna Sidón nna. Gutà'a tìe le' ttu yú'u nna labí uccua latsi'e qui'ni guna ca enne' qui'ni ri'e nía. Pero bina dihua cā. <sup>25</sup>Ttu niula nía nna bina taq̄ qui'ni re' Jesús látsi' nna bitsina'la nna beduỹib̄i ru'a lúe, porqui'ni dua ttu yĩ'ni niulí' cca padecer por ttu espíritu malo. <sup>26</sup>Lā nna gutta'yúniā ne qui'ni ebèqqiue espíritu malo lo losto' yĩ'ni niá. Niuláa nna labí uccua enne' judío sino nu raza lā sirofenicia. <sup>27</sup>Acca ra Jesús niuláa: Be'él-la' yā ca yĩ'ni enne' ná xana' yú'a go cā ti'ỹa bá ccání qui' qui, porqui'ni labí ná tsè' qui'ni ttu tàta cúa etta lo ná' ca yĩ'n̄i para gudàl-lā na ru'a lo ca beccu' to'. <sup>28</sup>Becàbi niuláa nna rā ne: Hualibani cuiā'lu' Señor, pero hàstaá ca beccu' to' canu tsè'e yārèe' meya nna ro cā ca pedazo to' nu rinnia ru'a meya làti ro ca yĩ'ni xana' yú'a. <sup>29</sup>Jesús nna ra tìe na: Tsè'ba becàbi lu', acca beyya bá litsi' lu', porqui'ni espíritu malua nna chía bétse'e latsi'ĩ yĩ'ni lu'a. <sup>30</sup>De betsina' niuláa litsi' niá nna bilá'niā yĩ'ni niá tīq̄ lo lònà nna labiru cca padecer por espíritu malua.

<sup>31</sup>Bedà' bá Jesús le' región qui' yetsi Tiro nna guttè tìe le' yetsi Sidón a'hua le' ca yetsi to' canu anta' le' región nu lá Decápolis, làniana bitsine'e ru'a indatò' qui' Galilea. <sup>32</sup>Nía nna tahua' tè cā ru'a

lo Jesús ttu enne' ná cuètsu nna rátti rú'ĩ nna. Gutta'yúni cā ne qui'ni gutsia né'e iquua nubeyu'a. <sup>33</sup>Gulèqqiua tìe na yà'latsi' la nna begà'a tè yūben'é'e le' ca yeru nagui'ĩ, betutu xèni'e nna belappe'e luèttsí'ĩ. <sup>34</sup>Guchìtha tè lúe gunne'e yīabara', gunèni latsi'e nna rèe na: Efata, quiere decir: Biyàlia. <sup>35</sup>Làniataá biyàlia chi ca yeru nagui'ĩ nna biyéni chìniā, a'hua biyàtsi nu runi qui'ni làa cca ínniā nna yala tsè' gunne chīq̄. <sup>36</sup>Yala gunèni Jesús cā qui'ni nú ttu tehuá nuya quixá'ani cā. Pero adí telá bedàa cā titsa'. <sup>37</sup>Biquila' yà'āba latsi' qui' nna ra cā: Iyáteni runie tsè', tàntua ca cuètsu nna runie qui'ni riyénini cā, a'hua canu yĩ' nna runie qui'ni rinne cā.

**8** Tiempo lània taá nna bitùppa iỹètse'ni ca enne' ru'a lo Jesús attu, pero labí biya té nía go cā, acca gutāyī tìe ca discípulo qui'āa nna rèe cabi: <sup>2</sup>Yala retúa látsa'a' ca enni'ĩ porqui'ni chi uccua tsunna ubitsa tsè'e cā nì lani inte', atsi'ĩni labiru biya té go cā. <sup>3</sup>Canchu ethèl-la' ya' cā litsi' qui' sin qui'ni làa go cā primero nna, hua gútsi latsi' qui' lo néda, porqui'ni ttu te cā nna idittu' tsè'ni da' cā. <sup>4</sup>Ca discípulo qui'āa nna ra cabi e: Caligáhuá taxi' ri'u nu go iyaba ca enni'ĩ porqui'ni tsè'e ri'u ttu lugar idittu' de làti anta' ca yetsi. <sup>5</sup>Jesús nna gunàba titsa' tìe cabi nna rèe: Bàl-lacà'a ettaxtíla dèni le. Becàbi cabi nna ra cabi e: Gàtsi. <sup>6</sup>Làniana rèe ca enne' yétsi'á qui'ni xúani cā loyu. Guyi' tìe gàtsi ca ettaxtílaá nna gunàbèe bendición lani Tata Dios, làniana

gùl-la' tìe ca ettaxtílaá nna betie lani ca discípulo qui'áa. Làcabi nna gut'ithia cabi çà lani ca enne' yétsi'á. <sup>7</sup>A'hua dèni huá cabi tuchùppa ca bél-la to'. Gunàbèe bendición, làniana rèe cabi qui'ni gutsia huá cabi çà ru'a lo ca enni'a. <sup>8</sup>Gutò çà ti'i'ya bá uccuaní qui' quí. Làniana betùppa tè cabi ca pedazo nu béxaá, gàtsi tsummi. <sup>9</sup>Ca enne' gutò lània nna hua ná ttú tappa mili' ti'gá çà. Làniana bechu titsa' Jesús çà. <sup>10</sup>Luégutaá nna gutè'e le' bárcuá lani ca discípulo qui'áa, dia cabi para región nu lá Dalmanuta.

<sup>11</sup>Làniana gul-lani tè ca fariséua guduló çà runi çà discutir lani Jesús, gunàba tènì çà ne qui'ni gunie ttu milagro ru'a lo quí nu gulue' qui'ni té la'huacca quì'e de yìabara', solamente para eyila çà néda ti'i'yala modo cu'ée ttu falta. <sup>12</sup>Jesús nna yala fuerte gunnèni latsi'e nna rèe: Bianicca calatsi' canu tsè'e nì ilá'ni çà ttu señal milagrosa de yìabara'. Hualigani te' riquixa'ánia' le qui'ni nidi ttu señal labí ilá'ni çà. <sup>13</sup>De rèe anía nna, betse'e latsi'e çà nna gutè'e le' bárcuá attu nna déyyeé para attu lado la indatù'a.

<sup>14</sup>Ca discípulo qui'áa nna biyul-lani cabi labí nùà' cabi biya go cabi sino tùteruba ettaxtíla nùà' cabi le' bárcuá. <sup>15</sup>Làniana gunèni Jesús cabi nna rèe: Lihue' cuidado lani levadura qui' ca fariséua' a'hua lani levadura qui' Herodes nna. <sup>16</sup>Ca discípuluá nna ra luetsi cabi: Porqui'ni labí nùà' ri'u ettaxtíla acca rèe la'. <sup>17</sup>Gutelí taáni Jesús nna rèe cabi: Biani nua' rue' le titsa'. Tsí porqui'ni labí ettaxtíla

nùà' le. Tsí bihua nì' télini le nihua làa nì' ennia le cuenta cá. Tsí àtsaba re'nià chul-la le' la' riyeni qui' le cá. <sup>18</sup>Hua dua gáláa íyyalo le, pero labí rilá'ni le. A'hua hua dua gáláa naga' le, pero labí riyénini le. Tsí labí rexa latsi' le. <sup>19</sup>Pues loti' gùl-lá'a' gayu' ca ettaxtílaá entre gayu' mili' ca enni'a nna, bàl-lacà'a tsummi thú tsá'ti'ni ca pedazo nu bexa betùppa le. Becàbi cabi nna ra cabi: Tsí'nu. <sup>20</sup>A'hua loti' gùl-lá'a' gàtsi ca ettaxtílaá entre tappa mili' ca enni'a, bàl-lacà'a tsummi tsá'ti'ni ca pedazo nu bexa bedi' le. Làcabi nna ra tè cabi: Gàtsi. <sup>21</sup>Làniana rèe cabi: Ti'ala modo áccá àtsàhua nì' télini le cá.

<sup>22</sup>Huía tè Jesús yetsi Betsaida. Ca enne' nía nna tahua' tè çà ru'a lúe ttu ciego, gutta'yúni çà ne qui'ni gulappe'e na. <sup>23</sup>Jesús nna gutèl-la' tìe ná' ciéguá nna guchi'e na fuera yetsi tú'a la nna gutàbie xèni' íyyaluí, betsia tè né'e iqquí, làniana gunàba tìtse'e na canchu hua rilá'nià ti'to'. <sup>24</sup>Là nna gunna' tià nna guduluà rilá'nià nna rā: Rilá' te' ca enne', pues rilá' te' çà ti'a yaga pero rida' çà. <sup>25</sup>Làniana belappa' tìe ca íyyaluí attu vuelta. Nubeyu'a nna gunna' tià attu, làniana benibia' tsi'a. <sup>26</sup>Bethèl-la' tè Jesús na litsi'í nna rèe na: Nu ttu tehuá nuya quixá'ani lu' le' yétsia'.

<sup>27</sup>Bitola nna huía tè Jesús lani ca discípulo qui'áa le' ca yetsi to' anta' exa bá ciudad nu lá Cesarea qui' Filipino. Néda bá yù'u cabi nna gunàba titsa' tè Jesús ca discípulo qui'áa nna rèe: Nuni rena ca enne' qui'ni ná inte' cá. <sup>28</sup>Becàbi cabi nna ra cabi e: Ttu te çà nna

rena cą qui'ni ná cuią'lu' Juan el Bautista. Attu te cą nna rena cą qui'ni ná cuią'lu' Elías. Adí cą nna rena cą qui'ni ná cuią'lu' ttu nuña la ca profétaá. <sup>29</sup>Lèe nna rèe cabi: Lebi'ì chúná, nula rulába latsi' le ná' ni'i. Becàbi Pedrua nna ra bi e: Cuią'bálu' Enni'a' enne' ná Cristo. <sup>30</sup>Pero Jesús nna gunènie cabi qui'ni nu ttu tehuá nuña quixá'ani cabi nui.

<sup>31</sup>Làniana guduló Jesús riquixa'ánie ca discípulo qui'áa qui'ni Nubeyu' de Ýiabara' nna té qui'ni queé padecer. Raáruhuée qui'ni canu rigú'ubia' le' yétsiá lani ca sacerdote principal nna ca maestro de la ley nna guyudí' cą ne hàstaá qui'ni gutti cą ne, pero bitola de tsunna ubitsa nna eyáthèe de lo lù'uti. <sup>32</sup>Claru tabá gutixa'ánie cabi qui'ni aníaba ná la' tté qui'e. Làniana gulèqquia yetsi' tè Pedrua ne nna guduló bi ritsa' bi e. <sup>33</sup>Jesús nna bedèqquia te lúe gunne'e ca discípulo qui'áa nna gutitse' Pedrua nna rèe: Becuitta ru'a lua' Pedro, ná lu' tì'na Satanás porqui'ni labí nabia'ni lu' nu cca qui' Tata Dios sino nu cca qui' ca enne' la. <sup>34</sup>Làniana gutàyi Jesús ca discípulo qui'áa a'hua adí ca enne' tsè'e nía nna rèe cabi: Canchu nuña calatsi'ì ccą ttu discípulo quia' nna, té qui'ni iyùl'lania' la'a labá nna ga'na dispuesto ccą sufrir biña para tanuą inte', tì'a inte' hua'nia' curutsi quia'. <sup>35</sup>Porqui'ni nuña tediba dua iquqì etúa latsi'ì la'labàni qui'ì nna, pues gunitti lą na. Pero nuña tediba iria latsi'ì la'labàni qui'ì hàstaá canchu caduel'la' gattią porqui'ni ríalatsi'ì inte' a'hua porqui'ni riquixá'ą

evangelio nna; lą nna ccabàni lą. <sup>36</sup>Canchu ttu enne' gata'nią itute riqueza qui' yétsiloyu, pero bitola nna nitti bá para siempre, biani gana ni benia' cá. Labí biña. <sup>37</sup>O biani tì' ná gute ttu enne' lani Tata Dios para gáyani' nu dacca' la'labàni qui'ì cá. <sup>38</sup>Yala nu tul'la' ná ca enne' tsè'e yétsiloyu, a'hua labí fiel ná cą lani enne' catsi'ínie cą. Pero nuña tediba ettu'nią quixá'ą nu cca quia' nna ca titsa' quíy'ì nna, entonces inte' Nubeyu' de Ýiabara' nna ettu' huá te' na canchu chi gal'la' tsá el'lania' lani ca ángeli de ýiabara' nna la'yani bàni qui' Tàta quí'a nna.

**9** Jesús nna ra huée cabi: Hualigani te' riquixa'ánia' le qui'ni tuchùppa canu tsè'e nì lani inte' nna labí gatti cą hàstaá qui'ni ilá' ýani cą il'lani reino qui' Tata Dios lani la'huacca qui'e.

<sup>2</sup>Xuppa ubitsa bitola nna gulèqquia Jesús Pedrua nna Jacóbua nna Juáan nna yà'latsi', gùchi'e cabi lo ttu i'ya xeni tsè'. Làniana bilá'ni cabi qui'ni bettsiáni la' rinna' qui'e. <sup>3</sup>Beyacca tittiní ýúe tsíttsi tùnì tì' taání beyi'. Lanú té le' yétsiloyu' nu ccani reyì lári' tsíttsi tùnì tì'a beyacca ca ýúeá. <sup>4</sup>Làniana de repente taá nna gudu Moisés nna Elías nna ru'a lo cabi nna rue' cabi titsa' lani Jesús. <sup>5</sup>Gunne tè Pédrua nna ra bi Jesús: Maestro yala tsè' canchu eyà'na ri'u nì. Annana guni tu' tsunna yú'u l'la' to', ttu para cuią'lu' nna, attu para Moisés nna, attu para Elías nna. <sup>6</sup>Pédrua nna nihua làa yù bi biña nuá ra bi, pues tsè'e la cabi lani la' rátsilatsi'. <sup>7</sup>Làniana gul'lanì ttu bía nna benia' ýula qui' cabi

nna biyeni tè tsi'í ttu enne' gunnie dèsdèba le' bía nna rèe: Là enni'í enni'á' ÿì'nia' yala catsi'í ti' e, liudà naga' le quì'e. <sup>8</sup>Luégutaá gunna' cabi, pero lanuru nuŷa bilá'ni cabi sino alatèruba Jesús. <sup>9</sup>De beyadi cabi lo i'yaá nna gunèni Jesús cabi qui'ni nú ttú tehuá nuŷa quixá'ani cabi nu bilá'ni cabi sino hàsta'na qui'ni Nubeyu' de ÿiabara' nna eyáthee de lo lù'uti. <sup>10</sup>Por nui nna bihua bedàa cabi titsa', pero entre làba cabi nna gunàba titsa' luetsi cabi sobre de biŷa nua' diánie loti' rée qui'ni eyáthee de lo lù'uti. <sup>11</sup>Làniana gunàba titsa' cabi e nna ra cabi e: Bianicca ca maestro de la ley nna rena cā qui'ni náduel-la' ita yà'lala Elías cá. <sup>12</sup>Becàbie nna rée cabi: Hualiba, yà'la Elías ita, làbi nna guni bi arreglar tsè' iyábani ca cosa. Pero biani ra lo Escritura acerca de nu cca qui' Nubeyu' de ÿiabara' cá. Pues ra qui'ni yala quéé padecer porqui'ni yala rutsibi cā ne. <sup>13</sup>Pero riquixa'ánia' le qui'ni Elías nna chila bita bi, a'hua bethacca' cā bi iyate nu uccua latsi' qui' tì'a ga'na escrito nu cca qui' bi.

<sup>14</sup>De betsina' Jesús làti tsè'e adí ca discípuluá nna bilá'nie nuŷé tsè'ni ca enne' tsè'e cā ita'lùba cabi, tsè'e huá ca maestro de la ley nna runi cā discutir lani cabi. <sup>15</sup>De bilá'ni iyábani ca enni'a Jesús nna yala biquila' latsi' qui' nna bigàa chì cā nna huía cā beni cā ne saludar. <sup>16</sup>Lèe nna gunàba titsa' tìe cā nna rée: Bianica yala riyeyya le. <sup>17</sup>Gunne tè ttu nu látsi' canu yétse'á nna rā: Maestro, nì chí'a' ÿì'ni yì'í lani cuiá'lu', porqui'ni cā padecer por ttu espíritu malo nu runiā na

nu ŷí. <sup>18</sup>Espíritu maluŷ nna, gaŷa tediba reequia ÿì'ni yì'í rel-laniā nna rudàl-la tabá na loyu ruxitti'níā na nna bettsina'ní ruduā rú'í, a'hua royà'a tsùni layi'í nna yala chi retsittā runiā. Acca chi pá'a' ca discípulo qui' cuiá'lu'a' qui'ni ebèqquia cabi espíritu maluŷ' fuera, pero labí uccuani cabi. <sup>19</sup>Becàbi Jesús nna rée cā: Lebi'í canu diátia' canu labí ríalatsi'. Atsálicà'a itsá dà te' cuenia' lani le. Atsálicà'a itsá té qui'ni guchia' le cá. Litahua' nubeyu' cui'í'ā nì. <sup>20</sup>Làcā nna tahua' tè cā nubeyu' cui'í'a ru'a lo Jesús. Bilá' báni espíritu malua Jesús nna prontu tabá beniā qui'ni biŷitti'ní nubeyu' cui'í'a fuérteni, làniana berixi betetsiníā na loyu nna bettsina'ní beduā rú'í. <sup>21</sup>Jesús nna gunàba titsa' tìe tàta qui' níā: Tsaliaŷa itsá chi uccua ridácca'a' anía. Becàbiā nna rā ne: Dèsdèba nā nito'. <sup>22</sup>A'hua iŷé vuelta tsè' chi bedàl-lā na lo yi' a'hua le' inda para guttiā na. Acca canchu huacca qui' cuiá'lu', guni cuiá'lu' tu favor lani intu' nna, betúarú latsi' cuiá'lu' intu' nna beyuni cuiá'lu' a. <sup>23</sup>Jesús nna ra tìe na: Canchu hua ríabá latsi' lu', porqui'ni para canu ríalatsi' nna iyaba ná posible. <sup>24</sup>Tàta qui' nubeyu' cui'í'a nna prontu taání guniā iditsa nna rā: Hua ríalátsa'a', Señor, pero gutua cuiá'lu' nu ruthàga'a' qui'ni tsíalátsa'a' adí tsè'. <sup>25</sup>De bilá'ni Jesús qui'ni adiru enne' yétse'ní rituppa ita'lubánie nna ruquini luetsi qui, acca guttsa' chie espíritu malua nna rée na: Lu' espíritu mudo nna cuètsu nna, inte' nia' lu': Bèria, bíttuúru eyeqquia lu' attu lani nubeyu' cui'í'í. <sup>26</sup>Espíritu

malua nna yala fuerte guretsiyà'la nna bexitti'níá nubeyu' cuíti'a nna beria tiá. Nubeyu' cuíti'a nna nu yatti taá tíá, acca nuýé cã nna ra cã: Chi gùttiã. <sup>27</sup> Pero Jesús nna bedàxu'e ní'ì nna bèthuli tiè na. Lã nna gudu taá. <sup>28</sup> Bitola de chi re' Jesús le' yú'a yà'ba latsi' nna, ca discípulo qui'áa nna gunàba titsa' cabi e nna ra cabi: Biecca intu' nna bihua uccuani tu' gudàl'la tu' a fuera cá. <sup>29</sup> Lèe nna rèe cabi: Luetsi ca espíritu malua' nna labí yá eria bá cã sino lani oración nna ayuno nna.

<sup>30</sup> De bedà' cabi nía nna guttè cabi región qui' Galilea. Jesús nna labí uccua latsi'e qui'ni nuýa guna, <sup>31</sup> porqui'ni riquixa'ánie ca discípulo qui'áa nu chi' da'la nna rèe: Nubeyu' de Ýiabara' nna gute cã ne cuenta latsi' ná' ca enne' nna gutti cã ne, pero tsunna ubitsa bitola de chi gùttie nna eyáthee de lo lù'uti. <sup>32</sup> Ca discípu'luá nna labí gutéelíni cabi biýa nuá rèe cabi, a'hua labí beyáýani cabi inàba titsa' cabi e.

<sup>33</sup> Làniana huía Jesús le' yetsi Capernaum. De chi ri'e le' yú'u nna, gunàba titsa' tiè ca discípulo qui'áa nna rèe cabi: Biani nuá beni le discutir de yù'u ri'u nédaá. <sup>34</sup> Pero làcabi nna labí becàbi cabi, porqui'ni de yù'u cabi nédaá nna bè' cabi titsa' sobre de nùýalá cabi ccá adiru enne' ýeni. <sup>35</sup> Jesús nna gudua tènìe nna gutàyi tiè tsì'nu ca discípu'luá nna rèe cabi: Canchu nuýa calatsi'ì ccã nu neru nna, pues ná qui'ni guniã servir iyaba ca compañero qui'ì nna ccã ti'a ttu nu labí dacca'. <sup>36</sup> Làniana guýi' tè Jesús ttu huatsa to', bedue na lahui' cabi,

bedua tiè na lo ýíbie nna rèe cabi: <sup>37</sup> Nuýa guniã recibir ttu huatsa to' luetsi huátsi'ì porqui'ni ríalatsi'ì inte' nna, pues ti'atsi inte' bá nuá runiã recibir. A'hua nu runiã inte' recibir nna, álahuá tsua' teruba inte' runiã recibir, sino hàstala enne' guthel'le'e inte'.

<sup>38</sup> Làniana gunne Juáan nna ra bi Jesús: Maestro, bilá'ni tu' ttu enne' qui'ni lani nombre qui' cuiá'lu' nna runiã mandado ca espíritu malo qui'ni eria cã lo losto' ca enne', pero labiru be'él'la' tu' a guniã seguir porqui'ni labí láníã ri'u.

<sup>39</sup> Becàbi Jesús nna rèe cabi: Bittu guthàga' li a, porqui'ni nuýa enne' runi milagro lani nombre quia', pues labí eyeqquia tiã ínniã contra a'. <sup>40</sup> Porqui'ni nu labí nã contrario qui' ri'u nna, pues parte ri'u bá duã. <sup>41</sup> A'hua lebi'ì nna, nuýa tediba gunnã màsqui'di ttu vaso inda í'ya le lani nombre quia' porqui'ni ná le enne' quia', hualigani te' riquixa'ánia' le qui'ni lã nna segúruní thí'ã bendición.

<sup>42</sup> Nuýa diba guniã qui'ni ìnnia le' tul'la' nuýa ttu canu xcuichu to' canu ríalatsi' qui' inte' nna, pues inte' nna nia' le qui'ni enne' gulú'u fáltaá nna adila tsa' iýìqquia yánì lani ttu íyya molino nna gudàl'la tè cã na lahui' indatò'. <sup>43</sup> Canchu por ca cosa mal nu runi ná' lu' acca chi ná lu' enne' tul'la' nna, pues guchu telá a; porqui'ni adila tsa' thua turuba ná' lu' nna gata' là'labàni nu labí ttíã qui' lu' ti'ca'la tsia chùppa ná' lu' nna tsía lu' lo yi'bél'laá nu ra'l'la'ã tulidàba, <sup>44</sup> làti ca bedua' qui' qui' nna labí gatti cã, nihua yí'a nna labí eyòlã. <sup>45</sup> A'hua canchu

nì'a lu' runià qui'ni runi lu' tul-la' nna, guchu telá a; porqui'ni adila tsa' qui'ni thua turuba nì'a lu' nna gata' là'labani nu labí ttíà qui' lu' tì'ca'la tsia chuppa nì'a lu' nna tsía lu' lo yi'bél-laá nu ral-la'á tulidàba, <sup>46</sup>làti ca bedua' qui' qui' nna labí gatti ca, nihua yí'a nna labí eyòla. <sup>47</sup>A'hua canchu ttu lado íyyalo lu' runià qui'ni runi lu' tul-la' nna, gulèqquia telá a; porqui'ni adila tsa' ccá lu' pertencer lani Tata Dios le' reino qui'e lani turuba íyyalo lu' tì'ca'la tsia chuppa íyyalo lu' nna tsía lu' lo yi'bél-laá. <sup>48</sup>Nía nna ca bedua' qui' qui' nna labí gatti ca, nihua yí'a nna labí eyòla. <sup>49</sup>Acca iyaba ca enne' nna miéntraste bàni ca, pues dàni ca ccá ca probar lani sufrimiento para ccá ca purificar, tì'a iyaba ca sacrificio uccua duel-la' tsù'u ca dete'. <sup>50</sup>Yala ri'yu' dete', pero canchu dèti'a gunittia' la' i'yé' qui'ni nna, biala lani eyàccania' i'yé' cá. Dete' nna ri'yu'a para nu ná tsè'. A'hua lebi'ni nna, líúdua iquua le guni le nu ná tsè' nna gappa la' yēni qui' luetsi le.

**10** Beria tè Jesús le' yetsi Capernaum nna hué para región qui' Judea a'hua hàstaá attu lado qui' yò Jordán. Nía nna bedetùppa taá i'yétse'ni ca enne' ru'a lúe. Lèe nna gudulue gutixa'ánie ca ca enseñanza nu cca qui' Tata Dios tì'a runi bée. <sup>2</sup>Bitsina' tè canu gulání religión fariseo para eyila ca néda ti'iya modo cu'ée ttu falta, acca gunàba titsa' tè ca ne sobre de canchu hua ná tsè' éla'á ttu nubeyu' niula qui'ni. <sup>3</sup>Lèe nna becàbie nna rée ca: Biani bedia Moisés para guni le. <sup>4</sup>Becàbi ca

nna ra ca: Moisés nna beni ba bi permitir qui'ni ttu nubeyu' nna ilithà acta de divorcio nna éla'á tìà niula qui'ni. <sup>5</sup>Becàbi Jesús nna rée ca: Por la' necio qui'ba le acca bedia Moisés nua'. <sup>6</sup>Pero dèsdeba nerua loti' beni Tata Dios yétsiloyu nna, pues nubeyu' nna niula nna benie ca enne'. <sup>7</sup>Acca por nui nna ná qui'ni guthà'na ttu nubeyu' tàta nàna qui'ni itsà' tìà niula qui'ni. <sup>8</sup>Làniana chuppa tè ca nna ccá ca ttùba; labiru ná chuppa ca, sino ttùba cuerpo nna espíritu nna chi ná ca. <sup>9</sup>Acca por nui nna, nu bettsà' Tata Dios luetsi qui' nna, labí ná qui'ni nu'ya el-la'á ca. <sup>10</sup>De tsè'e ca discípu'luá lani Jesús le' yú'u nna bede nàba titsa' tè cabi e sobre de matrimonio. <sup>11</sup>Lèe nna rée cabi: Nu'ya tediba éla'á niula qui'ni nna gúttsaní'ni lani attu niula nna, entonces chi nà adulterio nu runià. <sup>12</sup>A'hua canchu ttu niula gútse'e latsi'ni nubeyu' qui'ni nna gúttsaní'ni lani attu nubeyu' nna, entonces chì hua ná adulterio nu runià.

<sup>13</sup>Làniana tahua' tè ca enne' ca huatsa to' qui' qui' ru'a lo Jesús para qui'ni gutsia né'e iquua qui'. Pero ca discípu'luá nna gutìl-la la cabi ca enne' dia ritahua' ca huátsáa. <sup>14</sup>De biyénini Jesús nu ra ca discípu'luá nna yala sentir ucuee nna ra tìe cabi: Líhue'él-la' ca huatsa tú'a' ibiga' ca ru'a lua', bittu guthàga' le ca; porqui'ni ca enne' té fe qui' qui' tì'a nu té qui' ca huatsa' nna, qui'ba qui' ná reino qui' Tata Dios. <sup>15</sup>Hualigani te' riquixa'ánia' le qui'ni nu labí tsíalatsi'ni Tata Dios para qui'ni quée enne' rigú'ubia'nie na tì'a ríalatsi' ttu huatsa to' nna,

entonces labí gá'á le' reino qui'e.

<sup>16</sup>Là'niana gu'yi' Jesús ca huátsáa nna gul'lánie ca nna betsia tè né'e iququia qui nna benie ca bendecir.

<sup>17</sup>De chi beyèl-la' Jesús néda déyyéé attu làti huaya' nna, quèthani bigàa ttu nubeyu' bitsina'á bedu'yi'bi ru'a lúe nna gunàba titsa'á ne nna rā: Maestro completamente enne' tsè', biani gunia' para gata' la'labàni nu labí ttíā quia' cá.

<sup>18</sup>Jesús nna rēe na: Bianicca ra lu' inte' enne' completamente tsè' ni'i. Ni ttú lanú té ná completamente tsè' sino tūteruba Tata Dios. <sup>19</sup>Hua nabia' bāni lu' ca mandamiento: Bittu thualàni lu' nu labí ná tselu lu'. Bittu gúttí lu'. Bittu cuana lu'. Bittu ichìtha lu' bela'na qui' ca enne'. Nú ttu nu'ya guthácca'yi' lu'. Gùppa respeto tàta nàna qui' lu'. <sup>20</sup>Becàbiā nna ra tìā ne: Iyaba ca mandamiéntuā' runia' dèsdeba ná' xcuichu to'. <sup>21</sup>Jesús nna gunna' tìe na lani la' retúalatsi' nna rēe na: Hua reyatsaárùnì lu' áttuló: Beyya nna betti' iyate nu té qui' lu', bete tì ā lani ca enne' rittè là'di', là'niana yiabara' lá nna gata' ríqueza qui' lu'. Acca lu' nna gutà tè ga'na lu' dispuesto guchia lu' ccá lu' sufrir para tanó lu' inte'.

<sup>22</sup>Nubeyu'a nna de biyéniniā ca tìtsi'ì nna yala nùyue uccuaniā nna, triste tsùba beyeqquia, porqui'ni adila uccuatsi'ínìā ca interés té qui'ì. <sup>23</sup>Là'niana gunna' tè Jesús ìta'lùba làti duéa nna rēe ca discípulo qui'áa: Hualigani yala tabi ná para canu té ríqueza qui' qui' gá'a ca le' reino qui' Tata Dios. <sup>24</sup>Ca discípuluá nna yala uccuayí latsi' cabi por ca titsa' nu rēe.

Raáruhuá Jesús cabi: Yi'nia', canu rappa confianza bel-liu qui' qui' nna, yala tàbi ná qui'ni hue'él-la' ca qui'ni Tata Dios nna quée enne' cu'úbia'nie ca. <sup>25</sup>Adila fácil ná tté ttu animal xeni tì'a ttu camello le' yeru to' qui' ttu gu'ya, tì'chula ttu rico gá'á le' reino qui' Tata Dios. <sup>26</sup>Là'niana adila uccuayí latsi ca discípuluá nna ra luetsi cabi: Entonces núlá ccáni l-lá cá.

<sup>27</sup>Gunna' tè Jesús cabi nna rēe: Para ca enne' nna labí ná posible, pero lani Tata Dios nna huacca; porqui'ni lani Tata Dios nna fácil taá ná iyábani ca cosa. <sup>28</sup>Là'niana gunne tè Pédrua nna ra bi e: Intu' nna iyáyi'ate chi bethà'na tu' nna chì denó tu' cuiā'lu'. <sup>29</sup>Becàbi Jesús nna rēe: Hualigani te' riquixa'ánia' le qui'ni iyaba canu iria ca le' litsi' qui' por inte' nna guthà'na ca ca loyu qui' qui' l-le, ca bettsi' qui' l-le, ca dana qui' l-le, tàta nàna qui' qui' l-le, niula qui' qui' l-le, ca yi'ni qui' l-le, para quíxá'a ca evangelio nna, <sup>30</sup>làca nna thí' ca ágáyua' tántula miéntraste tsè'e ca yétsiloyui: ca yú'u l-le, ca hermano l-le, ca madre l-le, ca hermana l-le, ca yi'ni l-le, ca loyu l-le, a'hua guyudí' ca enne' ca nna gutsia latsi' qui' ca l-le. Pero tiempo nu chì' da'la nna edacca' latsi' qui' tulidàba porqui'ni té la'labàni nu labí ttíā qui' qui'.

<sup>31</sup>Pero nu'yetse' canu neru annana, ccá lá ca nu bitote. A'hua nu'yetse' canu bitote annana, ccá lá ca nu primeru.

<sup>32</sup>Yù'u tè cabi néda dia cabi para Jerusalén, Jesús nna denéru lo cabi. Gul'lanì ttu la' rátsi'latsi' lo losto' cabi nna, pero denó tè

cabi e nna labí yù cabi biya ná la' rulábalatsi' qui'e. Gulèqquia yètsi'e ca discípuluá entre ca enne' yétsel'á nna gudulúe gutixa'ánie cabi iyaba ca cosa nu guthacca' çà ne nna, <sup>33</sup>rèe: Annana dia ri'u Jerusalén, nía nna gute çà Nubeyu' de Yíabara' cuenta latsi' ná' ca sacerdote principal a'hua latsi' ná' ca maestro de la ley; làçà nna cueqquia çà sentencia qui'e para gattie, làniana gute çà ne cuenta latsi' ná' canu dittu' canu rigú'ubia' le' ciudadad nna, <sup>34</sup>guni çà ne burla nna, gututu xèni' qui ne nna gutti çà ne pero bitsa tsunna nna eyáthee de lo lù'uti. Anía rèe cabi.

<sup>35</sup>Làniana gubiga' tè ca yí'ni Zebedéua, lá cabi Jacobo nna Juan nna ru'a lo Jesús nna ra cabi e: Maestro, calatsi' tu' inàbani tu' cuià'lu' ttu favor. <sup>36</sup>Lèe nna rèe cabi: Biani calatsi' le gunia'. <sup>37</sup>Becàbi tè cabi nna ra cabi e: Canchu gal-la' tsá thí' cuià'lu' la' rigú'ubia', benna bál-la cuià'lu' derecho qui' tu' xúaní tu' cuitta' cuià'lu', ttu tu' lado bàni, attu ttu' lado yatti. <sup>38</sup>Jesús nna rèe cabi: Labí ritelíni le biya nua' rinàba le. Tsí ina ri'u guchia ba le tté le iyaba ca sufrimiento nu ná qui'ni ccá' padecer cá. <sup>39</sup>Làcabi nna ra cabi e: Guchia bá tu'. Ra tè Jesús cabi: Hualigani qui'ni ccá huá le padecer tì'a inte' ccá' padecer. <sup>40</sup>Pero de xúaní le lado ná' bània' nna lado ná' yattia' nna, álahuá quia' ná para gunna ya' a sino chi beni Tata Dios na preparar para canu caba latsi'e. <sup>41</sup>De biyénini á tsii ca discípuluá anía nna, yala bitsa'áni cabi Jacóbua nna bettsi'

bi Juáan nna. <sup>42</sup>Pero Jesús nna gutàyi tìe cabi nna rèe cabi: Hua yù ba le qui'ni canu rigú'ubia le' ca nación nna runi taání qui' qui itúbani; a'hua canu re' cuenta nna yala aprovechar runi çà ca enne'. <sup>43</sup>Pero entre lebi'ì nna labí ccá á'. Sino qui'ni canchu nuya calatsi'ì ccá enne' yèni entre lebi'ì nna, ná qui'ni ccá lá nu gunià tsina lo le. <sup>44</sup>A'hua canchu nuya la ttu le calatsi'ì ccá nu neru nna, ná qui'ni ccá lá nu gunià iyaba le servir. <sup>45</sup>Porqui'ni Nubeyu' de Yíabara' nna labí dé'e para guni ca enne' tsina lúe, sino para gunie iyaba çà servir, a'hua para gute la'labàni qui'e para qui'ni l'lá nuyetse' ca enne'.

<sup>46</sup>Làniana bitsina' cabi yetsi nu lá Jericó. De chi dia Jesús érie le' yétsiá lani ca discípulo qui'áa nna, dia tehuá iyétsel'ni ca enne'. Nía nna cuitta' nédaá re' tè ttu ciego láa Bartimeo yí'ni Timeo huenàba limosna. <sup>47</sup>De biyéninià qui'ni dia Jesús enne' Nazaret néda nía nna, acca gunnià iditsa na ra: Jesús Yí'ni David enne' uccua rey, gùppa cuià'lu' la' retúalatsi' quia'. <sup>48</sup>Iyetsel' ca enne' tsè'e nía nna gutìl-la tè çà Bartiméua qui'ni guthàya rú'ì, pero là nna adila iditsa gunnià nna ra: Cuià'lu' Yí'ni David, betúa latsi' cuià'lu' inte. <sup>49</sup>Guleda tè Jesús nna rèe çà qui'ni taxi' çà ciéguá. Làçà nna huía tè çà nna ra çà na: Bedacca'ni nna gùduli, porqui'ni Jesús nna rinnie lu'. <sup>50</sup>Enne' ciéguá nna guru'na taá lári' qui' niá nna gùduli chià nna bitsina' a ru'a lo Jesús. <sup>51</sup>Jesús nna rèe na: Biani calatsi' lu' gunia' por lu'. Là nna ra ne: Maestro, calátsa'a' elá' te'. <sup>52</sup>Ra

tè Jesús na: Labiru ná lu' ciego, porqui'ni chi ríalatsi' lu' inte'; anna tè béyya litsi' lu'. Enne' ciéguá nna luégutaá belá' chiniá nna dia tiá denúq Jesús lo nédaá.

**11** Exa tegáabá Jerusalén chi deyya cabi nna, bitsina' cabi ca yetsi Betfagé nna Betania nna, frente ttu i'ya láq Monte de los Olivos. Jesús nna guthel-la' tiè chuppa ca discípulo qui'áa nna, <sup>2</sup>rèe cabi: Lítsía le' yetsi to' nu re' frente taá téteá. Canchu chi bitsina' le nna hua taxacca' diga le làti tá' ttu burro to' nu nidi ttu enne' labí chi gutsia na. Ethàtsi li á nna eche' tetsate' li á nì. <sup>3</sup>Canchu nuŷa gá le: Bianicca rithàtsi li á nna, gá tè li á qui'ni Señor nna riquina'nie na, annaba ethèl-le'e na. <sup>4</sup>Huía cabi nna taxacca' cabi burro tú'a nàl-la'niá ru'a yú'u fueralá làti rittè nédaá, bethàtsi tè cabi á. <sup>5</sup>Tuchùppa canu tsè'e nía nna ra ça ca discípuluá: Bianicca rithàtsi le burro tú'á' ni'i. <sup>6</sup>Làcabi nna becàbi cabi ti'ba nu chi ra Jesús cabi. Làça nna be'él-la' taá ça cabi. <sup>7</sup>Làniana deche' tè cabi burro tú'a làti du Jesús. Guxua tè cabi ca lári' qui' cabía cui'ì. Jesús nna gutsia tiè na. <sup>8</sup>Làniana iŷetse' ca enne' nna gutsila ça ca lári' lo néda, attu te ça nna gutittsa ça ca lla' qui' ca yà nna benita' tè ça ça lo neda para ttíe. <sup>9</sup>Ca enne' denérua á'hua canu denál-la'a nna gunne ça iditsa nna ra ça: Quiŷaru Tata Dios. Bendito enne' da' por mandado qui' Señor Dios, <sup>10</sup>ica'rubà qui'ni chi bi'yu tsá gul'lani la'rigú'ubia' qui' ta' tàta qui' ri'u David, la' dàliani para Tata Dios enne' dua ŷiabara'. <sup>11</sup>De

bitsina' Jesús le' ciudad Jerusalén nna gutà'a tiè le' templua nna gunna' tiè iyaba ca cosa yù'u nía, pero luégutaá berie le' templua nna deyye para Betania la lani tsì'nu ca discípulo qui'áa porqui'ni chi ràl-là làniana.

<sup>12</sup>Attu yu'utsa nna beria cabi le' yetsi Betania, Jesús nna gutùnie. <sup>13</sup>Làniana bilá' tènè idittu' ti'a du ttu yà exxuhuí. Huía tiè hueyu canchu xiaba tsia exxuhuí lúì, pero de bitsine'e làti dua naá nna labí biŷa té lúì, sino puro l-la' ba ná, porqui'ni álahuá tiempo exxuhuí nuá. <sup>14</sup>Làniana ra tè Jesús yà exxuhuía: Dèsdèba anna nú ttu teéruhá go fruta lo lu' cá. Ca discípulo qui'áa nna biyeni tènè cabi rèe anía.

<sup>15</sup>Betsina' diba cabi Jerusalén nna gutà'a tè Jesús le' lí'a qui' templua nna bedàl-lèe fuera canu tsè'e nía huetti' nna huì'i nna, berixie ca meŷa qui' canu rittsilá bél-liuá á'hua ca xila' qui' canu rutti ça becha nna runi ça negocio ru'a templua. <sup>16</sup>Á'hua lanuru nuŷa be'él-le'e tté frente le' lí'a qui' templua canchu nùà' ça yuà'. <sup>17</sup>Gutixa'ánie ça nu ga'na lo Escritura nna rèe: Tsí álahuá ra Tata Dios lo titsa' qui'e: Yú'u quíyi'ì nna duá para ìta iyáŷiani ca enne' hueni oración lì'ì, atsi'íni lebi'ì nna ttu bèl-là qui' ubana la chi náni li á. <sup>18</sup>Ca maestro de la ley á'hua ca sacerdote principal nna biyéni ça nu rèe, acca uccua latsi' qui' gutti ça ne; pero yala gutsini ça porqui'ni iyaba ca enne' nna yala guyú'u latsi' qui' ca titsa' nu gutixe'e. <sup>19</sup>Gùl-là diba làniana nna beria Jesús le' ciudad.

<sup>20</sup>Attu yu'u dílaá nna guttè cabi làti du yà exxuhuía nna bilá'ni cabi qui'ni chi gubitsiá dèsdèba ca l'új hàstaba puntu qui'ì. <sup>21</sup>Pédrua nna bexa tè latsi' bi, acca gunne bi nna ra bi: Maestro, gunna' tsáruhuá cuiá'lu' yà exxuhuí nu beni cuiá'lu' maldecir nayáa nna, chi gubitsiá. <sup>22</sup>Jesús nna rèe cabi: Lígappa confianza lani Tata Dios. <sup>23</sup>Hualigani te' nia' le qui'ni nuŷa tediba gá' i'ya duì: Becuitta nna guttè lo indatò' la, pero bittu gudu chùppaniá na sino qui'ni tsíalatsi'ì qui'ni nu chi rā na huacca cumplir, làniana hua ttìá. <sup>24</sup>Acca nia' le qui'ni iyaba nu inàba le lani oración, canchu hua té fe qui' le qui'ni huadi' le nu inàba le nna, huadi' li á. <sup>25</sup>Canchu chi runi le oración nna rulaba tè latsi' le biŷa contra ttu enne' nna, leyúniŷén ŷá latsi' le qui'ì ántesca guni le oración, para qui'ni Tata qui' le enne' dua ŷiabara' nna eyuniŷén huá latsi'e ca tul-la' qui' le. <sup>26</sup>Porqui'ni canchu bihua eyuniŷén latsi' le qui' ca enne' canu rigú'u falta lani le nna, nihua Tata qui' le enne' dua ŷiabara' labí eyuniŷén latsi'e ca tul-la' qui' le.

<sup>27</sup>Làniana betsina' tè cabi attu Jerusalén. Loti' reni Jesús le' templua nna bitsina' tè ca sacerdote principal nna ca maestro de la ley nna á'hua adí canu rigú'ubia' le' yétsiá ru'a lúe nna, <sup>28</sup>ra çā ne: Nuni por mandado qui'ni acca runi lu' ca coşì. Nuni benna derecho qui' lu' para guni lu' ca nui cá.

<sup>29</sup>Becàbi tènì Jesús çā nna rèe çā: Á'hua inte' nna inába títsa' huá' le. Canchu ecàbini le inte' nna, lànialá nna quixa'a' nuŷa benna la'huacca

quia' acca runia' ca coşì. <sup>30</sup>Gala da' derecho qui' Juan el Bautístaá para guni bi bautizar cá, tsí de ŷiabara' o tsí ca enne' ba bete derecho qui' bi áccá. <sup>31</sup>Làniana guduló çā bè' çā títsa' ti'ŷyala ecàbini çā ne nna ra luetsi qui': Canchu ina ri'u qui'ni poder qui' Juáan para guni bi bautizar nna dá'á de ŷiabara', entonces gá taá ri'u: Bialacca làa huálatsi' le qui' bi cá; <sup>32</sup>á'hua canchu ina ri'u qui'ni ca enne' ba bete permiso qui'ì nna. Pero lá' yala gutsini çā biŷa guthacca' ca enne' yétsiá çā, porqui'ni para iyaba ca enne' nna hualigani uccua Juáan ttu profeta qui' Tata Dios. <sup>33</sup>Acca mejor la becàbini çā Jesús nna ra çā ne: Labí yù tu'. Làniana becàbi Jesús nna rèe çā: Nihua inte' nna labí quixá'ania' le nuŷa benna la'huacca quia' acca runia' ca coşì.

**12** Làniana guduló Jesús gunènie çā por medio de comparación nna rèe: Gùdua ttu ènne'yu' nna gùdà bi planta qui' betsulí' le' loyu qui' bi. Bedeqquia tè bi á li'ya, á'hua guleqquia tè bi ttu pozo làti guxàtta çā iquua betsulí'a para cueqquia çā inda qui'ì. Á'hua bedu tè bi ttu torre para tsappi bi hué' bi cuidado loyu làti guda bi betsulí' qui' bi a: Làniana bète sàte bi lóyúa lani canu guni çā na tsina. Làbi nna guda' tè bi dia bi idittu'. <sup>2</sup>De chi gùl-la' tiempo cosecha qui' betsulí'a nna, guthel-la' bi ttu mozo lani canu runi tsina le' lóyúa para qui'ni edi'á fruto nu ná qui'ni thí' bi qui' loyu qui' bi a. <sup>3</sup>Pero canu runi tsina le' lóyúa nna bedaxu' la çā enne' guthel-la' bi a. Yala idí' bè' çā na, bethel-la' tè çā

nna, bittu tení biya bete ca éyu'a.  
 4Bedethèl-la' gáabá bi attu mozo,  
 pero làcá nna gutèl-la' lá ca íyya na  
 bè' ca iquua niá nna bethel-la' tè ca  
 na ttú ruduadí' ba ca na. 5Làniana  
 xana' lóyúa nna bedethèl-la' bi adí  
 iýé ca, pero bè' huá ca ttu te a'hua  
 attu te ca nna betti ca ca. 6Por  
 último nna guthel-la' bi propio  
 gani yi'ni bi enne' yala cats'íni  
 bía nna ra bi: Huappa cà'abá ca  
 respeto yi'ni yi'i. 7Pero canu runi  
 tsina lóyúa nna gulù'u titsa' luetsi  
 quí nna ra ca: Lá nui nuá' eyà'ná  
 ituba lóyúj, acca lítsa' gutti ri'u a  
 para qui'ni ccá qui' ri'u itute nu  
 reda' latsi' tàta qui' niá na. 8Acca  
 bedaxu' chì ca yi'ni bía nna betti  
 ca bi, bedal-la' tè ca cuerpo qui' bía  
 fuera lóyúa. A' beni ca. 9Acca, biani  
 guni propio gani enne' ná xana'  
 lóyúa canchu chi éllani bi cá. Pues  
 gul-lùya bi latsi' canu betèsa bi  
 lóyúa nna, gutèsa tè bi a lani canu  
 huaya' la. 10Beni ba Jesús seguir  
 gunnie nna rèe: Tsí nihua nì' gúl-la  
 le lo Escritura làti ra:

Iyya nu labí guyú'u latsi' canu  
 rucùà' yú'a nna, chi nà íyya  
 principal nu adila tsittsi  
 naxu'a yú'a.

11La'a mismu gani Señor Dios chi  
 benie nui, nà ttu cosa nu dacca'  
 iquila' bání latsi' ri'u. 12Làniana  
 uccua latsi' quí gudaxu' ca Jesús,  
 porqui'ni gutelíni ca qui'ni contra  
 làba quí nuá gutixe'e ejémplua.  
 Pero gutsi bání ca biya guthacca'  
 ca enne' yétsia ca, acca adila tsa'  
 betse'e bá latsi' quí ne nna bedà' ca.

13Bitola nna guthel-la' ca  
 tuchùppa ca fariséua lani canu  
 gulání partido qui' Herodes ru'a lo

Jesús para canchu xiaba uquinnia  
 ca ne lani ttu titsa'. 14Bitsina' tè ca  
 nna ra ca ne: Maestro, hua yùba tu'  
 qui'ni rulue' cuiá'lu' tsua' teruba  
 nu ná lí, labí rátsini cuiá'lu' nu  
 rena ca enne'; porqui'ni nihua labí  
 rucué'ni cuiá'lu' ca enne' según  
 ná la' rinna' qui' quí, sino tturú'a  
 taá cani cuiá'lu' ca nna riquixa'a  
 cuiá'lu' lo néda lí gani qui' Tata  
 Dios. Gutixà'ani cuiá'lu' intu': Tsí  
 hua ná tsè' quiya ri'u nu ruthítsini  
 gobierno qui' César ri'u, o tsí bihua  
 áccá. Tsí gute tu' a, o tsí bíttuá  
 áccá. 15Pero Jesús nna gutelí  
 taánie qui'ni álahuá tsè'ni ca ra  
 ca anía, acca becàbinie ca nna  
 rèe: Biecca calatsi' le guni le inte'  
 prueba canchu xiaba ecàbia' ttu  
 titsa' nu labí ná tsè' ni'i. Litahua'  
 tsánna bel-liu para qui'ni inna' ya' a.  
 16Làcá nna betsia tè ca ttu moneda  
 ru'a lúe. Lèe nna rèe ca: Nuni  
 retrato qui'ní nui dua lo monedí  
 nna, a'hua nuni lóa ní nui dua nì.  
 Becàbi ca nna ra ca ne: Qui' César  
 enne' romano ná rey. 17Làniana ra  
 tè Jesús ca: Entonces líúte ba qui'  
 César nu ná qui' César, a'hua líúte  
 ba qui' Tata Dios nu ná para lèe  
 nna. Làcá nna yala biquila' latsi'  
 quí por nu becàbie.

18Làniana bitsina' tè ca saducéua  
 ru'a lúe. Làcá nna rena ca qui'ni  
 labí posible té qui'ni canu yatti nna  
 eyatha ca nna eyaccabàni ca attu,  
 acca gunàba titsa' tè ca ne nna ra  
 ca: 19Maestro: Moisés enne' gùdua  
 tiempo antigua nna bethà'na bi ley  
 lani ri'u nna ra bi qui'ni canchu  
 nuya ttu enne' gatti ttu bettsi'i nna  
 pero lanú yi'ní uccua, entonces  
 ná qui'ni guttsa taání'i lani niuláa

para qui'ni elithā descendencia qui' bettsi'ñi nu gúttía. <sup>20</sup>Pues gutsé'e gàtsi bettsi' ca enne'. Bettsa tená' nu néruá nna, pero gùtti bá nna lanu ÿi'ñi uccua. <sup>21</sup>Làniana nu cca chuppáa nna bettsa huání'ñi lani niuláa, pero gùtti huá nubeyu'a nna nihua lanú ÿi'ñi uccua. Ania tehua uccua lani nu cca tsunnáa, <sup>22</sup>hàstaá qui'ni iyaba canu gàtsi bettsi'a gùdua lani ca niuláa nna lanú ÿi'ni qui' uccua. Bitó tè nna gùtti huá niuláa. <sup>23</sup>Acca, canchu chi gal-la' tsá eyátha canu yatti nna eyaccabàni ca attu nna, núlá ca nuá ccá qui'ñi niuláa cá, yàqui'ni iyaba ca gàtsi bettsi'a nna bettsaná' qui' lani a. <sup>24</sup>Becàbi tè Jesús nna rèe ca: Yala ridacca'ÿi le, porqui'ni labí ritelíni le nu ra lo Escritura, nihua la' huacca qui' Tata Dios nna labí ritelíni li a. <sup>25</sup>Porqui'ni canchu chi gal-la' tsá eyátha canu yatti nna, lanuru nuÿa guttsaná' porqui'ni iyaba ca nna ccá ca tì'a ca ángel tsè'e ÿiabara'. <sup>26</sup>Pero acerca de canu yatti ná qui'ni eyátha ca de lo lù'uti nna, tsí bihua nì' gúl-la le lo Escritura qui' Moisés loti' gunèni Tata Dios bi dèsdèba le' ttu tittsa yèttse' nu ritèlal-laní nna rèe: Inte' ná' Dios qui' lu' a'hua qui' ca ta' enne' gùla qui' lu' Abraham nna Isaac nna Jacob nna. <sup>27</sup>Acca nia' le qui'ni nì nna ritelíni qui'ni a'hua ca enne' chi gùtti nna bàni bá ca nna runi bá ca Tata Dios adorar. Acca yala equivocado ga'na le.

<sup>28</sup>Làniana gubíga' tè ttu maestro de la ley. Chi biyéniniá nu beni ca discutir lani Jesús a'hua qui'ni yala tsè' becàbinie ca, acca gunàba tìtsa'a ne nna ra: Biani

mandamiento ní ná nu adiru dacca'. <sup>29</sup>Becàbi Jesús nna rèe na: Mandamiento nu adiru dacca' de lo iyaba ca nna ra í: Lu' yetsi Israel, bedà naga' lu' nýi'ñi: Señor Dios qui' lù'a nna ttu terúbée rigú'ubia' lo iyate; <sup>30</sup>acca cátsi'íni lu' Señor Dios qui' lu' lani itute losto' lu', lani itute la' rulábalatsi' qui' lu', lani itute latsi' lu', a'hua lani itute fuerza qui' lu'. Lá nui ná mandamiento nu adiru dacca'. <sup>31</sup>A' tegáhuá ná mandamiento nu cca chuppáa: Cátsi'í huáni lu' iyaba ca luetsi enne' lu' ti'atsi la'a lù'ba. Labí attu mandamiento té nu adiru dacca' tì'chu ca nui. <sup>32</sup>Làniana nu ná maestro de la ley nna ra Jesús: Maestro, yala tsè' rinne cuiá'lu', hualibani cuiá'lu' qui'ni ttu terúbá Dios ná, lanu attu Dios té fuera de lèe. <sup>33</sup>A'hua para cátsi'íni ri'u e lani itute losto' ri'u, lani itute la' rulábalatsi' qui' ri'u, lani itute latsi' ri'u, lani itute fuerza qui' ri'u nna, a'hua para cátsi'íni ri'u iyaba ca enne' ti'atsi la'a ri'u ba nna, pues adírlulá tsè' para guni ri'u ca nui tì'chula iyaba ca sacrificio nu rutsia ri'u lo altar o bíÿaáru ca ofrenda ni l-le rute ri'u para Tata Dios. <sup>34</sup>De biyénini Jesús qui'ni yala lani razón becàbiá, acca rèe na: Ati'to' taá reyàtsa para ccá lu' pertenecer le' reino qui' Tata Dios. Làniana lanuru nuÿa beyáÿani inàba tìtsa'a ne adí. <sup>35</sup>Beni ba Jesús seguir gutixe'e ca enseñanza nu cca qui' Tata Dios le' templua nna rèe: Ti'ani modo acca rena ca maestro de la ley qui'ni Cristua nna née ÿi'ni David enne' uccua rey, <sup>36</sup>atsi'íni la'a mísmuba David gunne bi acerca de lèe por

la' riyeni tsè' nu bete Espíritu Santo qui' bi nna ra bi:

Señor Dios nna gunènie Señor quiya'a nna rèe:  
Gùduani cuittá'a' lado bàni,  
Hasta qui'ni gúnna' latsi' ná' lu'  
iyaba canu làa cca guyu ça lu',  
Para qui'ni gúl'liani lu' iquua qui.

<sup>37</sup>Acca nia' le qui'ni por ca titsa'a nna yù ri'u qui'ni la'a mísmuba David nna reya bi Cristua SEÑOR. Entonces ti'ala modo acca née Ýi'ni David, pero runi la David ne adorar cá. De ra Jesús anía nna, acca ca enne' ýétse'nía nna adírulá guyú'u latsi' qui' gudà naga' qui' qui'e.

<sup>38</sup>Jesús nna gutixà'aníe ça attu enseñanza nna rèe: Líhue' cuidado lani ca maestro de la ley, porqui'ni labí ná tsè' la' rulába latsi' qui' qui'. Yala rú'ulatsi' qui' cueni ça lo ca néda lani ýó tuni qui' para qui'ni gulaba latsi' ca enne' qui'ni yala enne' re' cuenta ná ça, a'hua yala ru'u latsi' qui' gappa ca enne' ýetse' ça titsa' de reqquia ça lo neda.

<sup>39</sup>Yala rú'ulatsi' qui' xúaní ça lo ca asiento dàa íqquiará' tè le' ca sinagoga a'hua canchu chi ral-la' fiesta qui' qui' nna. <sup>40</sup>Rigua ça ca interés nu te qui' ca niula viuda nna runi tè ça oración tuni tsè' ru'a lo ca enne' para gulue' ça ti'atsi yala enne' lí ná ça. Làça nna yala fuerte ná castigo thí' ça.

<sup>41</sup>Ttu vuelta nna re' Jesús le' templua èxaba làti tsia caja làti rigú'u ça ofrenda. Rinna' tie ca enne' ritsina' rigú'u ça bel'liu le' cájaá. Ýetse' ça nna yala rico ná ça, iýeni tsè' ofrenda rute ça. <sup>42</sup>Bitsina' tè ttu niula pobre ná viuda nna,

gulu'a chuppa moneda nu de cobre dacca' ça ti'to' terúbá. <sup>43</sup>Gutàyi tè Jesús ca discípulo qui'áa nna rèe cabi: Hualigani te' riquixa'ánia' le qui'ni niula viúdì nna rittiá là'di', pero adila iýeni ofrenda betiá para Tata Dios tì'chula iyaba canu rigú'u bel'liu le' cája'. <sup>44</sup>Porqui'ni iyaba ca nua' nna bete ça nu rexabáni ça, pero niulí nna màsqui'ba rittiá là'di' pero bete lá itute hàstaá nu ná gónía.

**13** De beria Jesús le' templua nna ra tè ttu discípulo qui'áa ne: Maestro, gunna'áruhua cuiá'lu' ti'íya èl-la ná ca iyya' a'hua ti'íya latsite cua' ca edificiaú'. <sup>2</sup>Becàbi tè Jesús nna rèe bi: Tsí hua rilá'ni lu' ca edificio ti'íya xeni ná ça; pero i'yu tsá qui'ni labí eyà'na iquua luetsi ca iyya xeni nu cuáa'ni templu, porqui'ni hual-lani canu da' idittu' nna guthinnia gutappa'ní ça iyáyiate ça.

<sup>3</sup>Huía tè cabi lo i'ya láa Monte de los Olivos nu dua frente taá templua. Nía nna gure' tènì Jesús. Làniana Pédrua nna Jacóbua nna Juáan nna Andrés nna gunàba titsa' cabi e yà'ba latsi' nna, <sup>4</sup>ra cabi e: Calatsi' tu' quixá'ani cuiá'lu' intu' cuaýa ccá ca cosí, a'hua biani señal ni ilá'ni tu' para ccá tu' saber ántesca thulo iyaba ca cosí. <sup>5</sup>Becàbi tè Jesús nna rèe cabi: Líhue' cuidado qui'ni nú ttu nuýa guthacca'yíá le. <sup>6</sup>Porqui'ni nuýetse' íl'lani lani nombre quia' nna ina ça qui'ni làça nuá Cristua. Anía modo nna ca enne' ýetse' guthacca'yí ça. <sup>7</sup>Canchu chi iyénini le ina ça qui'ni da' guerra nna bittu gátsini le, nihua canchu ina ça qui'ni chi

cca guerra nna. Porqui'ni náduel-la' cca ca così, pero nihuani labí chi gùl-la' tè fin. <sup>8</sup>Porqui'ni ttu nación nna til-là contra attu nación a'hua ttu gobierno contra attu gobierno nna. A'hua iyé lettia tsè' tté la' riỹú', íl-lani huá ubina' nna a'hua yala alboroto ccá. Ca così nna ná cã nu chì' thulo rubáni ca dolor. <sup>9</sup>Lihue' cuidado por la'labàni qui' le, porqui'ni gute cã le cuenta lani ca uxticia, a'hua le' ca sinagoga qui' qui' nna hué' cã le lani cuarta. Pues hàstaá ru'a lo ca gobernador nna a'hua ca rey nna tahua' cã le porqui'ni ríalatsi' le inte'. A' modo nna gute le ttu testimonio tsè' lani cã acerca de inte'. <sup>10</sup>Antesca íl-lani fin nna náduel-la' qui'ni yà'llaỹa ccá predicar evangelio lani iyãỹiani ca enne' le' yétsiloyu. <sup>11</sup>Canchu chi iche' cã le para gute cã le cuenta lani ca uxticia, bittu nùyue ccani le ti'iyã ecàbi le, nihua labí gulaba xàttàga latsi' le nna. Sino ca titsa' nu etsèla latsi' le la'a mísmuba hóraá nna nuá bá ina le. Porqui'ni álahuá lebi'í nuá inne, sino Espíritu Santo bá ínnie por medio de lebi'í. <sup>12</sup>Ttu bettsi' nna gutiã cuenta la'a bettsi' bíj para gattiã, a'hua ttu tàta nna gutiã cuenta la'a yi'ni bíj, a'hua ca yi'niá nna eyeqquia cã contra ca tàta nàna qui' qui' hàstaá qui'ni gutti cã cã. <sup>13</sup>Iyaba cã nna guyudí' cã le porqui'ni ná le ca enne' ruthète' quia'. Pero nu thú bá tsittsi lani inte' hàstaá fin nna, lànua nna l-lá. <sup>14</sup>Pero canchu chi ilá'ni le nu guniã nu ccaba latsi'í lugar làti labí ná qui'ni thúã, t'ia chi gutixa'a Daniel enne' uccua profeta (nu rul-la nna hue'él-la' latsi'í téliniã),

làniana canu tse'e le' región qui' Judea nna ucuitta cã tsía cã lo ca ló'ya lá. <sup>15</sup>Nuỹa tediba duã iqquia azotea qui' yú'u quì'í nna, eyàdiã nna ucuitta tabá, bittu éya'a le' yú'u para thí'a biỹa té quì'í. <sup>16</sup>A'hua nu reni fuera lo tsina quì'í nna, bittu eyeqquia litsi'í para gutuppã ca yú'í, sino ucuitta tabá. <sup>17</sup>Pero canchu chi gal-la' tsá nna ica'rútsi'íru ca niula nu nùà' huatsa to', a'hua canu rugátsi' yi'ni qui'. <sup>18</sup>Acca línàbani Tata Dios lani oración qui'ni canchu chi gal-la' tsá ucuitta le nna bittu ccã tiempo idil-la'. <sup>19</sup>Porqui'ni canchu chi gal-la' tsáa nna íl-lani ca sufrimiento fuérteni nu labí ni' cca dèsdaba gùre' yétsiloyu hàstaá tiempo tsè'e rí'u'í, nihua làa ccá ruhuã bitola nna. <sup>20</sup>Cáalá Señor nna labí gudàttsi'e ca tsá tiempo qui' ca sufrimiento nu chì' da'la nna entonces lanú nuỹa l-lá. Pero por la' retúalatsi' qui'e lani canu chi becuí'e nna, acca gudàttsi'e ca tsáa. <sup>21</sup>Làniana canchu nuỹa gã le: Linna' tsaruhua nì du Cristua, o, línna' tsaruhuá nà' taá dùe, bittu tsíalatsi' le. <sup>22</sup>Porqui'ni hual-lani làti tsè'e le canu ina cã qui'ni làcã nuá Cristua ti'a adí canu ina cã qui'ni rinne cã parte Tata Dios, pero labí líni cã. Làcã nna guni cã iyé ca milagro nna a'hua adí cosa de la' huacca nu ccáyíni latsi' ca enne' para qui'ni gurèxaèl-la' cã cã xiaba hàstaba canu chi rée'ni Tata Dios. <sup>23</sup>Ca nui riquixa'ánia' le con tiempo bá. Acca lítsé'e al tanto.

<sup>24</sup>Cuantu taání tté sufrimiento qui' ca tsáa, làniana bitsã' nna echùl-lã, a'hua biuá'a' nna labiru gudàni'a. <sup>25</sup>Ca bélia nna ìnnia cã

de ÿiaba, a'hua iyaba canu tsia ÿiaba nna tatittiní cã. <sup>26</sup>Làniana ilá'ni cã Nubeyu'a íl'lanie le' bía lani la' huacca nna lani itute la' yani' de ÿiabara' nna, <sup>27</sup>íthel'la' tabée ca ángel qui'e nna gutùppa cabi iyáÿiate ca enne' reé'nie le' iyábani lugar qui' yétsiloyu, dèsdeba làti ril'lani bitsa hàstaba làti reniã. <sup>28</sup>Litelíni comparación qui' yexxuhuía: Canchu rerè'ne lúji nna rebia ca l-la' qui'í nna, anía modo ccá le saber qui'ni ch'ítaá duã íl'lani tiempo verano. <sup>29</sup>A'hua lebi'í nna, canchu chi ilá'ni le cca iyaba ca cosa nu chi riquixa'ánia' le nna, entonces ccá le saber qui'ni ch'ítaání duã íl'lani fin. <sup>30</sup>Hualigani te' nia' le qui'ni labí tté ca enne' tsè'e tiempo de ca señal nì ántesca thulo cca cumplir iyábani ca cosj. <sup>31</sup>ÿiaba nna yétsiloyuj nna l-luÿa bá latsi' qui, pero ca titsa' quíyí'í nna labí tté cã sino té qui'ni iyate cã ccá cã cumplir. <sup>32</sup>Lanú nuÿa yù biÿa tsá ní nihua biÿa hora ní, sino làteruba Tata Dios nna yùe; nìdirubani ÿi'ni Tata Dios labí yù bi, nihua ca ángeli tsè'e ÿiabara' nna. <sup>33</sup>Acca lebi'í nna lítsé'e al tanto, líhue' cuidado nna, lígúni oración, porqui'ni labí yù le cuaÿa tegá i'yu tsá nna i'yu hora nna. <sup>34</sup>Nu níyí'í nna ccã comparar ttu enne' dia bi idittu'. Bethà'na bi yú'u qui' bía nna beni bi disponer tsina qui' ttu ttu tsa qui' nna, bedu tè bi ttuã ru'a yú'u qui' bía para huí'ã cuidado hàstaá qui'ni él'lani xana' niá. <sup>35</sup>Acca lebi'í nna, lítsé'e huá al tanto. Porqui'ni labí yù le cuaÿa él'lani xana' lía. Xiaba él'lanie ch'í uccua taá yèlà, o ttu ríluela, o xiaba ttu ribetsi

béra, o ttú la' dá' ràni' taání l-le.

<sup>36</sup>Porqui'ni xiaba niyyani latsi' le él'lanie, alàa ti'élthi la le sino ribèda li e. <sup>37</sup>Nu riquixa'ánia' le nna níya' a para iyáÿiani ca enne': Lítsé'e al tanto.

**14** Achuppa ubitsa teruba reyatsa para gal-la' tsá pascua fiesta qui' ca enne' Israel canchu chi ro cã ettaxtíla sin levadura. Làniana ca sacerdote principal qui' qui' a'hua ca maestro de la ley nna gulú'u titsa' luetsi qui' tì'iyalá guni cã gudàxu' cã Jesús lani maña ba para gutti cã ne. <sup>2</sup>Ra cã: Alàa tsá gani fiéstã' gudàxu' ri'u a preso, para qui'ni làa ilá'ni ca enne' ÿetse' nna chatha alboroto le' ciudíj.

<sup>3</sup>Jesús nna ri'e le' yetsi Betania litsi' Simón enne' huí'ni yetsu' yùtsu'a. De duaníe lo meÿa nna bitsina' tè ttu niula nù'ã ttu frasco tsíttsi to' tà'a lí'í puro perfume nu rilàa' iÿixi nu dacca' yaÿi tsè'. Gùl-la'a tiã yáni fráscuá nna bedua tiã perfúmea iquiqua Jesús. <sup>4</sup>Tuchùppa canu tsè'e nía nna liú'u latsi' ba qui' bitsa'áni cã nna ra cã: Biecca uccua tittia perfúmeã' ni'i; <sup>5</sup>porqui'ni nui nna huatsitò'o telá téelá tsunna gayua' denario para guni ri'u cualani ca enne' rittè là'di'. Acca yala betitse'èl-la' cã niuláa. <sup>6</sup>Pero Jesús nna rèe: Lihue'èl-la' a. Biecca ritsa' li a, pues lã nna chi beniã ttu obra tsè' por inte'. <sup>7</sup>Ca enne' pobre nna tulidàba tsè'e cã lani le; cuaÿa calatsi' le guni le para làcã ttu cosa tsè', huacca bá. Pero inte' nna álahuá tulidà rénia' lani le. <sup>8</sup>Niulíj nna beniã nu uccua rubániã guniã, porqui'ni con tiempo ba

beduā perfume cuerpo quia' nna  
beniā inte' preparar para canchu  
chi igàttsi'a'. <sup>9</sup>Hualigani te' nia' le  
qui'ni gaŷa tediba ccá predicar  
evangéliuŷ le' itúbani yétsiloyu nna,  
guna huá ca enne' nu beni niulíj.

<sup>10</sup>Làniana ttu canu tsì'nua láq  
Judas Iscariote nna huíq ru'a lo ca  
sacerdote principal para guniā trato  
lani cā nna gutiā Jesús cuenta latsi'  
ná' qui. <sup>11</sup>Làcā nna de biyénini cā  
nu ra naá nna yala bedácca'ni cā  
beni cā ofrecer gute cā bel'liu qui'j.  
Acca guduló taá Judas beyila latsi'  
til'iŷa modo gutiā ne cuenta.

<sup>12</sup>Primero tsá fiesta loti' ro cā  
ettaxtíla sin levadura nna rutti  
cā carnero para go cā nna para  
exa latsi' qui' primer pascua qui'  
ca ta' tàta qui' caniá, entonces ca  
discípulo qui' Jesús nna ra cabi e:  
Gani calatsi' cuiq'lu' tsá' tu' para  
guni tu' preparar go se' cuiq'lu'.

<sup>13</sup>Làniana guthèl-la' tiè chuppa  
ca discípulo qui'áa nna rèe cabi:  
Lítsia le' ciudaŷ, nía nna etsa' le' ttu  
nubeyu' dénúq' ttu ré'e inda, tanó  
tè li q. <sup>14</sup>Làti éya'q nna línneni  
xana' yú'a nna gá li q: Maéstruá  
nna guthèl-le'e intu' nna rèe: Gani  
nua' dua ttu cuarto làti ná qui'ni  
go sía' lani ca discípulo quíy'i'j nna  
guni tu' celebrar páscuŷ. <sup>15</sup>Lq nna  
gulue' taániq le' ttu cuarto xeni nu  
chà dualéda bá, duq' íqquiará' la  
porqui'ni yú'a nna nq nu chuppa  
cua'. Nía nna lígúni preparar se'  
ri'u. <sup>16</sup>Ca discípuLuá nna huía  
cabi le' ciudáad nna taxácca' cabi  
tì'a nu chi rèe cabi e. Nía nna  
beni cabi preparar para guni cabi  
celebrar pascua. <sup>17</sup>De gùl-la tsá  
lània nna, bitsina' Jesús lani tsì'nu

ca discípulo qui'áa. <sup>18</sup>De chi ŷuàni  
cabi lo méŷaá nna hua ro canna  
bá cabi nna gunne Jesús nna rèe:  
Hualigani te' riquixa'ánia' le qui'ni  
nuŷa la ttu le nù ro lani inte' nna  
gutiā inte' cuenta latsi' ná' canu  
labí cca guyu cā inte'. <sup>19</sup>Làcabi nna  
yala triste ùccuani cabi. Guduló ttu  
ttu tsa cabi nna ra cabi e: Tsí inte'  
cá. Attu bi nna ra bi: Tsí inte' áccá.  
<sup>20</sup>Becàbi tiè nna rèe cabi: Nuŷa  
ttùba le nu rugà'a ettaxtíla qui'j  
lani inte' le' plátuŷ, lq nua' gutiā  
inte' cuenta. <sup>21</sup>Nubeyu' de ŷiabara'  
nna hualigani ccá bá cumplir iyate  
nu ga'na escrito nu cca qui'e til'iŷa  
ná là' ritè qui'e, pero ica'rútsi'íru  
nu runiā ti'atsi nq amigo qui'e pero  
labí líniq; para lq nna adila tsa'  
cáalá bittu telá gùliq. <sup>22</sup>De chi ro  
cabi ttu te là'goá nna, guŷi' Jesús  
ettaxtílaá nna bì'e ca discípulo  
qui'áa nna rèe: Ligò, nui nna nq  
cuerpo quia'. <sup>23</sup>Làniana beditsè'e  
ttu vaso. De chi bì'e gracia Tata  
Dios nna betie qui' cabi. Iyaba  
cabi nna gù'yà cabi le' ttùba vásuá.  
<sup>24</sup>Ra tiè cabi: Nui nna nq réni quia'  
para qui'ni ccá seguro promesa  
cubi nu runia', para ca enne' ŷetse'  
ilàlia réni quia'. <sup>25</sup>Hualigani te'  
riquixa'ánia' le qui'ni labiru í'yá'  
inda qui' betsulí' hasta qui'ni i'yu  
tsá í'yá ya' q attu lani le le' reino  
qui' Tata Dios.

<sup>26</sup>De beyacca bil-la cabi hímnua  
nna huía cabi lo i'ya láq Monte de  
los Olivos. <sup>27</sup>Laniana Jesús nna rèe  
cabi: Iyaba le nna gútse'e latsi' le  
inte' nèle, porqui'ni Tata Dios nna  
rèe lo Escritura: Inte' nna gútía'  
permiso qui'ni gutti cā enne' ná  
Pastor, làniana ca carnero qui' bíá

nna gathilàlia çà. <sup>28</sup>Beni bá Jesús seguir gunnie nna rèe: Pero bitola de eyátha'a' de lo lù'uti nna, nérúa' lo le para etsa' ri'u Galilea attu vuelta. <sup>29</sup>Làniana gunne Pedrua nna ra bi e: Màsqui'ba iyaba çà gútse'e latsi' qui cuià'lu', pero inte' nna labí. <sup>30</sup>Jesús nna ra tie bi: Hualigani te' riquixa'ánia' lu' qui'ni nèle nna tsunna vuelta labí thí'ché' lu' qui'ni nabia'ni lu' inte', làniana cuetsi xcurúdia. <sup>31</sup>Pedrua nna adila tsittsi beni bi sostener nna ra bi: Màsqui'ba canchu caduél-la' gatti huá' lani cuià'lu', pero labí ínniá' qui'ni labí nabia' te' cuià'lu'. Anía tehuá ra iyaba ca discípulá.

<sup>32</sup>Làniana betsina' cabi ttu lettia láq Getsemaní nna rèe ca discípulo qui'áa: Nì bá líxuani làca'te tsa'á' gunia' oración.

<sup>33</sup>Guche' tie Pédrúa nna Jacóbua nna Juáan nna. Làniana guduló ùccuaní triste latsi'e nna tsì'irúbá ùccuanie. <sup>34</sup>Rèe cabi: Yala triste cani latsi' lóstu'a' ti'atsi chì' taání rattia'. Nì bá licuèda inte' nna bittu gá'athi le. <sup>35</sup>Guda' tie áti'to' tè nía lá nna, beduýbie nna benie oración, gunàbèe canchu hua ná posible qui'ni bíttuá quée sufrir nu ná qui'ni ttíe hóraá. <sup>36</sup>De chi runie oración nna rèe: Tata Ýitsi', iyá ýiábá ná posible para cuià'lu', gütua cuià'lu' sufrimiéntuñ lani inte', pero aláa tì' cabá látsa'a' sino ccábá según voluntad qui' cuià'lu'. <sup>37</sup>Beyequia tie làti tsè'e ca discípulo qui'áa nna ti'éthi bá cabi, acca rèe Pedrua: Tsí nihua ttu hora rúbá làa bechia tí' lu' bétsiala para guni lu' inte' acompañar cá, Simón. <sup>38</sup>Lítsé'e al tanto, lígúni oración

para qui'ni làa ìnnia le le' tentación. Hualígaláa yala dispuesto ná le ccá le enne' fiel lani inte', pero labí fuerza té qui' le. <sup>39</sup>Huíe attu nna benie oración, rèe la'a mísmuba ca titsa'a. <sup>40</sup>De betsine'e attu nna dedeti'éthi huá cabi attu, porqui'ni tsa'tí'bání bétsiala lo cabi, nihua làa yù cabi biýa ecàbini cabi e.

<sup>41</sup>Betsine'e nu cca tsunna vuelta nna rèe cabi: Tsí àtsabá ti'éthi le. Chi dacca'. Chi gùl-la' hora qui'ni Nubeyu' de Ýiabara' ttíe latsi' ná' canu tul-la'. <sup>42</sup>Léyátha nna léya'. Linna'áruhuá chi da' nu guniá contra inte' lani la' ruthacca'ýí.

<sup>43</sup>Àtsabá rinne Jesús nna gul-lani chì Judas nu uccuq ttu discípulo qui'e entre ca enne' tsì'nuá. A'hua iýtse'ni ca enne' da' lani a yù'u ná' qui' espada l-le yà l-le. Làca nna da' çà por orden qui' ca sacerdote principal nna ca maestro de la ley a'hua por canu rigú'ubia' le' yétsiá nna. <sup>44</sup>Judas nu gutiá ne cuéntaá nna gutixa'q ti'iyá ná seña nu guniá nna rā: Nu gutsa'lo ya'a nna, lq nuá, lebi'iy nna gudaxu' tabá li a, eche' li a nna guyu le qui'ni làa l-lá. <sup>45</sup>Bitsina' bá nna gubiga' taá ru'a lo Jesús nna rā ne: Maestro, Maestro. Làniana betsa' tè lúj ne. <sup>46</sup>Làca nna bedaxu' chi çà Jesús preso. <sup>47</sup>Ttu enne' entre canu tsè'e lani Jesús nna gulèqquia bi espada qui' bíá nna becàa ná' bi nna bè' bi huenitsina qui' nu ná huexána' qui' ca sacerdotéa nna guchu bi yeti nagui'í. <sup>48</sup>Jesús nna rèe çà: Tsí tì'a canu dia gudaxu' ttu ubàna da' le yù'u ná' le espada nna para gudaxu' le inte' preso cá. <sup>49</sup>Ttu ttu tsá bá gùri'a' le' templua nna gutixa'ánia'

iyaba le nu cca qui' Tata Dios, atsi'íni bihua bedàxu' le inte'. Pero ìí bá chi ná para qui'ni ccá tì'a ra lo Escritura acerca de inte'. <sup>50</sup>Làniana iyaba ca discípuluá nna bétse'e latsi' cabi e nna becuitta cabi.

<sup>51</sup>Denó tè ttu nubeyu' cuìti' ne tétsiá ttu sávana. Làçá nna bedàxu' huá çá na preso. <sup>52</sup>Pero la nna biria le' sávanaá nna becuitta, labí ÿúí nàccu'.

<sup>53</sup>Làçá nna guche' te çá Jesús ru'a lo huexána' qui' ca sacerdotéa. Làniana betùppa iyaba ca sacerdote principal nna ca maestro de la ley nna, a'hua adí canu rigú'ubia' entre ca enne' judíua nna. <sup>54</sup>Pedrua nna idittu' bá denó bi e hàstaá le' lí'a ru'a yú'u qui' huexána' qui' ca sacerdotéa. Nía nna gure' tè bi huètsà'a cuítta' yì' lani ca policiaá.

<sup>55</sup>Làniana ca sacerdote principal lani iyaba canu retùppa Junta Suprema qui' ca enne' judíua nna reyíla çá ttu causa contra Jesús para qui'ni gappa çá néda gute çá ne cuenta para gatti e, pero labí betseláni çá causa lí gani còtre. <sup>56</sup>Màsqui'ba iÿetse' çá gulitha çá bela'na qui'e pero yétsi' yétsi' bá rena ttu tsa çá. <sup>57</sup>Làniana gudulí tè tuchùppa çá nna gunne çá ca titsa' falso contra lèe nna ra çá:

<sup>58</sup>Chi biyénini tu' qui'ni gunniá nna ra: Inte' nna gutáppa'a' témpluj nu bénibàni ca enne', pero le' tsunna ubitsa teruba nna echítha'a' attu templo nu labí ccáni ca enne' guni çá. <sup>59</sup>Pero nìhuani anía nna álahuá ttùdi gunne çá. <sup>60</sup>Làniana gudulí tè huexána' qui' ca sacerdotéa nna gunàba titsa'a' Jesús nna ra: Tsi bihua biya ecàbi tí' lu'. Biani nua'

ra çá contra lu' cá. <sup>61</sup>Jesús nna tsi bá dùe, labí biya becàbie. Acca huexána' qui' ca sacerdotéa nna gunàba titsa' tià ne attu nna ra: Tsi ná lu' Cristo Ýi'ni Tata Dios Tsùna'. <sup>62</sup>Jesús nna rée na: Là inte'. A'hua i'yu tsá ilá'ni le Nubeyu'a duánie lugar de la' dàliani qui' la'huacca qui' Tata Dios nna íl'lanie lo bíá ÿiabara'. <sup>63</sup>Làniana huexána' qui' ca sacerdotéa nna guchèda'ní ÿúí para gulue' qui'ni yala bitsa'ániá nna ra: Biáruálá testíguní riquína'ni ri'u cá, <sup>64</sup>chi biyénini le ca titsa' mal qui'í contra Tata Dios, ti'atsi ná tulappa bá lani e. Annana biani ína le ccá qui'í cá. Iyaba çá nna biria çá còtre para gattie. <sup>65</sup>Làniana guduló ttu te çá nna betùtu xèni' qui' ne. Bethàya tè çá lúe lani ttu lári', làniana bè' çá ne puñete nna ra çá ne: Guna tsanna nuya nua' bi'a lù'na. Ca policiaá nna gutini ná qui' lúe.

<sup>66</sup>Pedrua nna re' ba bi le' lí'a ÿàrèe'. Bitsina' tè ttu criada qui' huexána' qui' ca sacerdotéa. <sup>67</sup>De bilá'niá Pedrua qui'ni du bi cuè'e yí'a, acca gunna' tsi'á bi nna ra: A'hua lu' nna gurèni huá lu' lani Jesús nazarénoa'. <sup>68</sup>Pedrua nna labí guýí'ché' bi nna ra bi: Labí nabia' te' bi, nìdi làa yúá' biya nuá' ra lu'. Biria tè bi fuera ru'a zaguán. Làniana guretsi xcurúdia. <sup>69</sup>Criadaá nna bilá'niá bi attu vuelta nna ra çá canu tsè'e nía: nubeyu'í nna guláni huá ca nuá'. <sup>70</sup>Pedrua nna ra bi attu qui'ni labí nabia'ni bi e. Ti'to' taá bitola nna canu tsè'e nía nna ra çá Pedrua attu vuelta: Hualigani qui'ni a'hua lu' nna ná lu' enne' qui' qui', porqui'ni ná lu' enne' Galilea, a'hua

là' rinne qui' lu' nna ttùba ná lani làcã. <sup>71</sup>Làniana beni chì Pedrua maldecir nna beni bi jurar nna ra bi: Labí nabia' te' nubeyu' nu ra líã'. <sup>72</sup>Luégutaá gurètsi xcurúdia cca chuppa vuelta. Làniana bexa tè latsi' Pedrua ca titsa' nu gunne Jesús loti' rèe bíã: Antescã cuetsi xcurúdia chuppa vuelta nna, guni lu' inte' negar tsunna vuelta. De bexa latsi' bi ca titsa' qui' Jesús, làniana yelia yelia ní guretsi bi.

**15** De da' ràni'a nna betùppa ca sacerdote principal lani ca maestro de la ley a'hua lani iyaba ca autoridad qui' ca judúa nna, bexìqquia cã Jesús nna guche' tè cã ne nna bete cã ne cuenta lani gobernador Pilatua. <sup>2</sup>Pilatua nna gunaba titsa'a ne nna rã: Tsí ná lu' rey qui' ca judúa' cá. Becàbie nna rèe na: Lù'ba chi ra á'. <sup>3</sup>Ca sacerdote principal nna betsia cã iyetse' queja contra lèe. <sup>4</sup>Acca gunàba titsa' tè Pilátua ne attu vuelta nna rã: Tsí bihua bíã ecàbi lu', bedaáruhuá naga' lu' iyaba ca queja ribèqquia cã qui' lu'. <sup>5</sup>Pero Jesús nna nìhuani labí becàbie, acca Pilátua nna uccuaỹibá latsi'í.

<sup>6</sup>Tsá gani fiesta qui' ca judúa nna té costumbre qui' gobernador Pilatua gúla'a ttu preso, nuã tediba inàba enne' yétsiá. <sup>7</sup>Méruá làniana nna té huá ttu nu huetti enne' litsi' iyyà láã Barrabás, a'hua adí canu uccua cã rebelde contra ca uxtíciá nna gutìlã cã nna betti cã enne'. <sup>8</sup>Bitsina' tè canu yétse'á nna gunàbani cã Pilatua qui'ni guniã tì'a ná bá costumbre qui'í. <sup>9</sup>Gunàba titsa' Pilatua cã nna rã: Tsí hua calatsi' le gúlá'a' nubeyu' ná Rey

qui' lebi'i ca enne' judúí. <sup>10</sup>Anía ra Pilátua porqui'ni gutelíniã qui'ni por la' yélati' bá tahua' ca sacerdote principal Jesús ru'a lúí. <sup>11</sup>Pero ca sacerdote principal nna gulù'u yí'ni cã latsi' ca enne' yétsiá qui'ni inàbani cã Pilatua: adila tsa' gúla'a Barrabás. <sup>12</sup>Làniana gunàba titsa' tè Pilatua cã attu nna rã: Entonces biani calatsi' le gunia' lani nubeyu' reya le Rey qui' lebi'i ca enne' judúí cá. <sup>13</sup>Pero làcã nna yala iditsa becàbi cã nna ra cã: Betaá' a lo curutsi. <sup>14</sup>Ra tè Pilatua cã: Pues, biani mal ni chi beniã ni'i. Pero làcã nna adila guretsiyà'a cã nna ra cã: Betaá' a lo curutsi. <sup>15</sup>Pilatua nna para qui'ni gudàliani bá enne' yétsiá na, acca bela'a Barrabás nna beniã mandado hue' cã Jesús lani cuarta nna betiã ne cuenta para qui'ni gútáa' cã ne lo curutsi. <sup>16</sup>Ca soldádua nna guche' cã Jesús le' lí'a yàrèe' palacio qui' gobernador. Nía nna bitùppa iyaba ca soldádua. <sup>17</sup>Begàccu' tè cã Jesús ttu lári' morado, a'hua gulù'u cã iquie ttu corona tianíã yèttse'. <sup>18</sup>Gudulò tè cã ribétsiyà'a cã ru'a lúe nna ra cã: Viva, Rey qui' ca judío. <sup>19</sup>Làniana bè' cã iquie lani yà nna betùtu tè xèni' qui' lúe nna beduỹibi qui' ru'a lúe ti'atsi yala titsa' gùppa cã ne. <sup>20</sup>Beni diba cã ne burla nna, bebèqquia cã lári' morado nu náccu'èa nna begàccu' cã ne ca yúeá attu. Làniana gulèqquia cã ne nna guche' cã ne para gutá' cã ne lo curutsi.

<sup>21</sup>Tiémpua nna bel'lani ttu nubeyu' Cirenéo láã Simón enne' ná tàta qui' Alejandro a'hua bettsi'í Rufo nna, déda'a de lo tsina nna,

behuà'ni duel-la' cą na curutsi qui' Jesús. <sup>22</sup>Guche' cą Jesús ttu lugar láą Gólgota, titsa' qui' ri'u nna ra: Iqquia Bega' Yatti. <sup>23</sup>Begù'yà tè cą ne vino chixià mirra, pero labí gú'yèè na. <sup>24</sup>Betaá' diba cą ne lo curútsiá nna guduló ca soldádua gùl-la'ání cą ca yúeá nna bedàl-la cą rifa lo qui para gulul'ą nuỹa ca yúeá gal-la' ttu ttu cą. <sup>25</sup>Ttú ritìj gà díla tì'ga nua betaá' cą ne lo curútsiá. <sup>26</sup>Letrero nu bedia cą biỹa cca té'e nía nna rą: REY QUI' CA ENNE' JUDIO. <sup>27</sup>Betaá' huá cą lo curutsi ttu ttu lado luítte'e chuppa ca ubana, ttuą lado ná' bànie, attuą lado ná' yattie. <sup>28</sup>Por anía nna uccua cumplir Escritura làti ra: Belàtsi' huá cą ne entre canu runi mal. <sup>29</sup>Canu gutté nía nna beduadí' cą ne nna bettá iqquia qui' nna ra cą: Eh, lu' nu rena qui'ni gutàppa' lu' témplua nna le' tsunna ubitsa teruba echìtha lu' ą, <sup>30</sup>pues bedilà la'a lù'ba nna beyàdi tsanna lo curútsiá'. <sup>31</sup>Anía tehuá beni ca sacerdote principal ne burla, ą'hua ca maestro de la ley nna ra luetsi qui': Canu huaya' nna bedilà bą, átsi'ini la'a labą nna labí ccaniğ gudilá. <sup>32</sup>Canchu ilá'ni ri'u Cristo Rey qui' yetsi Israel nà' eyádiğ lo curútsiá' nna, huíyya latsi' ri'u què'j. ą'hua canu tá' lo ca curútsiá nna beduadí' huá cą ne.

<sup>33</sup>Ttú tsì'nu hora tì'ga nna bechùl-la le' itúbani yétsiloyu hàstaá ritìj tsunna. <sup>34</sup>La'a mismu taá hóraá nna gunne Jesús idítsani nna rèe: Eloi, Eloi, lama sabactani; titsa' qui' ri'u nna rèe: Tata Dios quia', Tata Dios quia', biecca betse'e latsi' cuiğ'lu' inte'. <sup>35</sup>Tuchùppa canu

tsè'e nía, de biyénini cą qui'ni rèe anía, acca ra cą: Liúyuúruhuá, Elías bá rul-luíttsa'ą. <sup>36</sup>Làniana bigàa tè ttuą nna bedibìthą ttu esponja lani vinagre, bedua tiğ na lo ttu yíi na bi'ą ne í'yèe, nna rą: Licuèda, inna' ri'u canchu il-lani profeta Elías para echìda bi ą. <sup>37</sup>Làniana iditsa tsè' guretsi ya'a Jesús nna gùttie. <sup>38</sup>Làniateaá nna bireda' lári' rriani nu dàa le' témplua nna chuppa l-la'ání uccuą dèsdèba íqquiará' hàstaba yàrèe' por milagro qui' Tata Dios. <sup>39</sup>Capitán nu du guardia fréntetaá làti tá' Jesús lo curútsia, de biyéniniğ ti'ỹa iditsa gunne Jesús ántesca gattie nna, acca rą: Hualigani qui'ni nubeyul'j nna ną Yì'ni Tata Dios. <sup>40</sup>Idittu' tí'ba de nía nna tsè'e huá tuchùppa ca niula huenna'. Entre ca niuláa nna látsi' huá María Magdalena, ą'hua Salomé, ą'hua María nàna qui' Joséa bettsi' Jacobo nu cca nu cuíti'a nna. <sup>41</sup>Ca niuláa nna tanó huá cą Jesús loti' gurènie Galilea nna beni huá cą ne servir. Tsè'e huá iyétse'èru adí ca niula canu beni cą ne acompañar hàstaá Jerusalén. <sup>42</sup>Tsá làniana nna runi ca enne' judíua preparar para tsá édi'latsi' qui', acca mérutaá da' rál-là làniana nna <sup>43</sup>bitsina' José enne' Arimatéa. Uccua bi ttu enne' principal entre iyaba canu rigú'ubia' le' Junta Suprema qui' ca enne' judíua. Làbi nna gulèda huá bi il-lani la' rigú'ubia' qui' Tata Dios le' yétsiloyu. Lani valor ni gutà'a bi làti dua gobernador Pilatua nna gunàba bi cuerpo qui' Jesús. <sup>44</sup>Pilatua nna yala uccuaýi latsi'j de biyéniniğ qui'ni gùttì chì

Jesús. Beyãyi tia nu ná capitáan nna gunàba titsa'a na canchu là chi gùttie. <sup>45</sup>De chi uccua tsè' Pilatua saber por nu ra capitáan na, betia permiso lani Joséa qui'ni édi' bi cuerpo qui' Jesús. <sup>46</sup>Joséa nna huì'i bi ttu sávana tsè'ni nna bechida tè bi cuerpo qui' Jesús nna betùbi tè bi e sávanaá. Gutixa tè bi cuerpo qui' Jesús le' ttu bà nu bedua bi le' ttu íyyatò'. Làniana bettsíga' tè bi ttu íyya xeni tsè' ru'a bàa. <sup>47</sup>María Magdalena, a'hua María nàna qui' José nna, bilá'ni cabi lugar làti gutixa cabi cuerpo qui' Jesús.

**16** Guttè diba tsá sábaduá nna, làniana María Magdalénaá lani Saloméa a'hua María nàna qui' Jacóbu nna huì'i cabi unguento nu rilàa' i'yxí para tsía cabi ru'a bàa nna gudua cabi a cuerpo qui' Jesús. <sup>2</sup>Díla tò'ni primero tsá qui' semánaá huía cabi lo bàa nna bitsina' cabi nía chì' gul-lani taánì bitsa. <sup>3</sup>Ra tè luetsi cabi: Nù gánì cúá íyya xeni nu yáya rú'a bàa para qui'ni ccá gá'a ri'u. <sup>4</sup>De bitsina' cabi nía nna gunna' tsè' cabi nna bilá'ni cabi qui'ni íyyaá nna chi bituá ru'a bàa. <sup>5</sup>De gut'à cabi le' bàa nna bilá'ni cabi ttu ènne'yu' re' bi lado bàni, tùbi bi ttu làri' tùnì ní nna tsítti tùnì nna, yala biquíla' latsi' cabi. <sup>6</sup>Làbi nna ra bi ca niuláa: Bittu gátsini le, hua yúbá' qui'ni reyila le Jesús enne' Nazaret enne' bétti ca lo curútsia. Chi beyáthèe de lo lù'uti, lanúrué té nì. Litaáruhuá inna' le làti gutíxa ca ne. <sup>7</sup>Acca lítsia nna ligàtsi Pedrua a'hua adí ca discípulo qui'áa nna, ligàtsi cabi qui'ni tsíe Galilea, nía bá ettsà' iyaba li e tì'ba chi rée le.

<sup>8</sup>Ca niuláa nna bedà' cabi quèthani de lo bàa nna, biyìtti'ní cabi de tántua gútsini cabi. Lanú nuya bè' lani cabi titsa' lo néda de tántua la' rátsilatsi'.

<sup>9</sup>Bitola de beyátha Jesús de lo lù'uti díla primero tsá qui' semánaá nna, priméruete María Magdalénaá bilá'ni bi e, niula nu bebèquie gàtsi ca espíritu malo lo losto' bi. <sup>10</sup>Làbi nna huía bi taquixá'ani bi ca enne' guréni lani éa. Làcabi nna yala triste ùccuanì latsi' cabi nna ribetsi cabi. <sup>11</sup>De biyénini cabi qui'ni María nna bilá'ni bi Jesús qui'ni chi beyaccabànie, pero labí huíalatsi' cabi qui'í.

<sup>12</sup>Bitola nna de yù'u áchúppa cabi neda día cabi para yetsi qui' cabi nna bilá'ni cabi Jesús, pero labí bedácca' tènì cabi e. <sup>13</sup>Huía taá cabi taquixá'ani cabi adí ca discípuluá, pero nìhua labí huíalatsi' cabi. <sup>14</sup>Bitòyiani nna bilá'ni propio gani tsinia ca discípuluá Jesús loti' yuàni cabi lo méyáa. Gutìl-lèe cabi porqui'ni labí fe té qui' cabi nna yala duro uccua losto' cabi, porqui'ni labí huía tè latsi' cabi qui' ca enne' gutixà'a qui'ni chi bilá'ni cabi e de chi beyáthèe de lo lù'uti. <sup>15</sup>Làniana rée cabi: Lítsia itúyiani le' yétsiloyu, líquixá'ani iyáyiani ca enne' ca titsa' nu rulue' ti'íya modo l-lá ca. <sup>16</sup>Nuya diba tsíalatsi' nna ccá bautizar nna, la nna l-lá. Pero nu labí tsíalatsi' nna nitti bá. <sup>17</sup>Canu tsíalatsi' nna thí' huá ca la' huacca de yiabara' para qui'ni lani nombre quia' nna ebèquua ca fuera ca espíritu malo, a'hua ínne ca attu te ca titsa'; <sup>18</sup>a'hua canchu gudàxu' ca ca bè'là nna labí biya thacca'

ca, nihua canchu í'ya ca biya ti'na  
chixi veneno nna pues labí biya  
ccáni ca, a'hua canchu chi gutsia ná'  
quj iquia ca enne' ra'ni nna eyacca  
taá latsi' quj.

<sup>19</sup>Beyacca diba gunèni Señor  
Jesús cabi, làniana beyàppie  
yiabara' nna, gùri'e lado ná' bàni  
qui' Tata Dios. <sup>20</sup>Bedà' tè cabi

nía nna huía cabi itú lettia taání  
huequixa'áni ca enne' ti'iya modo  
l-lá ca. La'a mísmuba Señor nna  
benie cabi cualàni, acca belue'ní  
qui'ni té la' huacca qui' cabi de  
yiabara', prueba de qui'ni ca titsa'  
nu gutixa'a cabía nna ná' titsa'  
lígani.

A' uccua.